

B
SG25m

Maffei

Libri tres Sixti Quinti

Rare Book & Special
Collections ~~Library~~

Rare Book & Special
Collections Dept.

JO: PETRI
MAFFEI
BERGOMATIS

ESOCIETATE JESU

HISTORiarUM AB EXCESSU

GREGORII XIII.


LIBRITRES

SIXTI QUINTI

PONTIFICATUM COMPLE XI

Ex interioribus Romanis Tabulariis depromti

NUNC PRIMUM PRODEUNT.



BERGOMI, MDCCXLVI.

EXCUDERAT PETRUS LANCELOTTUS

EX AUCTORITATE SUPERIORUM.

JOANNIS PETRI
MAFFEJ
E SOCIETATE JESU

HISTORIARUM AB EXCESSU

GREGORII XIII.
PONT. MAX.

LIBER PRIMUS.

RES in Ecclesia Dei, Christo duce, ac præside gestas consignare literis jam inde ab Apostolicis temporibus institutum, ne posterius quidem omisere, vel sua sponte, vel jussu, decretoque Pontificum. Quibus e monumentis, quoniam longo sæculorum decursu, variisque casibus non pauca intercederunt, extitisse lætandum est hac hominum ætate viros, & pietatis & industriæ laude præstantes, qui veterum scripta e tenebris, ac rudibus eruta in ordinem redigere, totamque seriem Ecclesiasticæ historiæ in hanc usque diem perducere ingenti labore conentur. Quorum ego optima studia ut pro virili parte adjuvarem, extrema statim occupando festinantibus obviam ire, ac veluti conferta manu orbem narrationis implere constitui. Neque ut cetera defint, aberit fides, quando me a sæculi fluctibus atque ambitionis æstu longe semotum, neque gratia, neque odium a recto sensu detorquet: & mihi ad cognoscenda rerum eventa non solum, sed etiam eventorum causas atque consilia, præter communem vulgi notitiam interiores Principum literæ, atque ipsa demum arcana tabularia patuerunt.

Gregorio XIII. vita functo (cujus Pontificatus annales vulgi sermone jam ante confecimus) & exequiis rite persolutis, Patres unde-

A 2

qua-

quadraginta (neque enim plures in Urbe tunc erant) Conclave iniierunt . Supervenientibus dein peregre tribus , duorum & quadraginta expletus est numerus . Ab his ad fidem officiumque , & publica oratione , & sacra Eucharistia , & solemnī jūrejurando excitatis , de novo Pontifice eligendo agitari cœptum est . In eo clarissimorum hominum cœtu , cum e Principibus huic nimis opes , illi morum austeritas , quibusdam rerum gerendarum incertitia , plerisque turba propinquorum officeret ; ea ipsa procerum incommoda , viam ad summum honoris cultum Felici Peretto Montalto patefecere . Is in Picentibus humili natus loco , verum acri ac solerti ingenio , Minorum instituta professus , insignis primum Concionator evasit : mox ad Sanctæ Inquisitionis honorata ministeria adscitus , comes etiam & afflecla in Toletana caussa Ugoni Legato in Hispaniam datus , ac præterea multis in Catholica Religione tuenda laboribus periculisque perfunctus , Episcopatu Atheniensi , ac sacra demum purpura a Pio V. Pontifice Maximo decoratus est . Post obitum Pii a cognatis & clientibus admodum inops , in Exquilino secessu quietam vitam (quoad per Senatorias functiones licebat) censu modico , Sanctorum Patrum libris emendandis per aliquot annos exegit . Neque tamen suas interea spes felicitatemque destituit , miro obsequio , mira submissione , & (quemadmodum ipse postea referebat) e Senecæ doctrina , injurias accipiendo & gratias agendo , potentissimum quemque , & ipsos præcipue Cardinales sibi conciliare perrexit . Eo facilius proximo interregno , dum Principes inter se contendunt , adnitentibus Atestino , Mediceo , Bonello , Philippo etiam Boncompagno in societatem illesto , ad apicem Apostolatus evehitur octavo Kal. Majas , anno post Christum natum MDLXXXV . Sixti dein Quinti nomine assumpto , & caerimoniis de more absolutis , ad purgandos latrociniis Ecclesiasticos fines , ante omnia curas intendit . Per eos quippe annos vagi , obæratī exules , capitalia ausi plerique , ad prædam rapinasque congregati , incendia , cædes , terroremque circumferendo , non modo fertilissimos Italiæ campos , verum etiam Castella , Urbesque , & ipsa denique Romana ædificia , per summam indignitatem , infesta reddiderant . Magna etiam erat omnibus fere locis impunitas gladiatorum , & superato legum auxilio alacris , tamquam in victoria , volitabat improbitas . Adversum pestes ejusmodi Sixtus quam severissima levibus etiam de causis exerceri judicia , precibus , pretiove nullum dari locum , sublatīs asyis , maleficos atque Sicarios palam resistentes occidi , fugientes retrahi , latitantes indagine cingi , nihil inexpertum relinqui curavit . Gravia supplicia cognatis ipsorum , amicisque , si quempiam hospitio recepissent , aut ulla juvissent ope , proposuit . Contra si quis ex ipsa latronum colluvione aliquem eorum interfecisset , vincitumque tradidisset ; ampla & edixit præmia , & cum fide persolvit . Uti confcelerato bipedum generi , cibo tectoque interdiceretur ,

retur, a finitimis quoque Dynastis atque Prætoribus, per mutuas pactiones obtinuit. Per hunc fere modum Ecclesiæ Romanæ magno omnium Ordinum gaudio reddita pax. Et Sixtus alliciendis porro ad arcem Christianæ Religionis undequaque mortalibus, in Urbe novis operibus exornanda, cum Superiorum Pontificum magnificentia nobile certamen instituit. Ac primum Quirinales miræ amœnitatis Hortos humoris inopia laborantes, producta ex agro Columnæ a vigesimo fere lapide perpetuis fornicibus aqua, affatim irriguos fecit: quod e prioribus multi cogitaverant, ausus fuerat nemo. Eam ipse aquam egregiæ cælaturæ lacubus, aut labris non uno loco exceptam a pristino suo nomine Felicem appellavit. Egyptios insuper Obeliscos quatuor vel semiobrutos ruinis, vel etiam alte defossos, celeberrimis Urbis locis erexit, atque a nefaria solis veneratione (cui decepta olim eos consecrarat antiquitas) ad veri Numinis cultum defixa in vertice Cruce, traduxit. Eximiæ artis ac proceritatis columnas cochlides Antonino, & Trajano olim positas, Petro, Pauloque inclytis Ecclesiæ Romanæ Parentibus cum inaurato utriusque signo, dicavit. Vaticanum admirandæ celsitudinis aspidem e Michaelis Angeli typo, itemque in peramœnum Urbis, Villarumque prospectum, aperto ac salubri loco, novas miræ pulchritudinis Ædes extruxit. Bibliothecam Apostolicam ex area squallenti ac depressa, maligno lumine, in editiorem theatri Medicei partem junctis porticibus extulit, varioque picturæ genere decoravit: inter alia repetitis ex ultima antiquitate, ac non sine proprio cujusque elogio, redditis omnium ferme literarum, ac doctrinarum inventoriis. Bibliothecæ huic in custodum usus amplas adjecit ædes, annoque vertente (quod hac tempestate mirere) totum opus absolvit. Idem in Exquilina Mariæ Virginis Æde, ornatissimum excitavit Sacellum, translato in id Præsepium, quod olim, obstupesciente natura, Conditorem humani generis excepit. Super hæc ad augustissima Urbis Templâ vias latas aperuit, direxitve sex, magno populi commodo. Hæc & alia multa sui Principatus monumenta, dum Sixtus ingenti parat mercede, ac simul tuendo, vel etiam proferendo, si casus daretur, imperio, subsidia sine fine conquirat; omnes rei nummariæ vias inire coactus, adverso plebis rumore, dubium fecit, largior ne in profundenda, an accuratior in reponenda pecunia fuerit: quippe cum idem & ædificiis auri decies tulerit expensum, & ferme quinquagies in Hadriani mole reliquerit, omni cautione per sacram legem adhibita, uti ne quid a posteris de tota summa temere detrahi posset. Insuper idem auri ducenta millia, partim collocandis in matrimonio puellis egentibus, partim iis, qui civiles ob causas ære alieno premerentur, e custodia liberandis attribuit. Alimentis quoque Populi Romani, & peregrinorum intenta semper cura consuluit: ac depositis adversus frumentariorum aviditatem ducentis aureorum millibus, & ubi tempora postularent, dimissis quoque alio

alio emtoribus, laxioris Annonæ, cum omni copia rerum, toto ferme suo Pontificatu, haud immeritam laudem & gloriam tulit: eidemque ænea statua in Capitolio est collocata cum inscriptione hujusmodi. SIXTO QUINTO PONT. MAX. OB QUIETEM PUBLICAM, COMPRESSA SICARIORUM, EXULUMQUE LICENTIA, RESTITUTAM: ANNONÆ INOPIAM SUBLEVATAM: URBEM ÆDIFICIIS, VIIS, AQUÆ DUCTIBUS ILLUSTRATAM S. P. Q. R. Hæc maxime in populari administratione præclara Sixti facinora celebrantur. Neque tamen idem in Sacris Ritibus, placitisque, & in Ecclesiastica libertate vel tuenda, vel augenda (quæ propriæ Pontificum partes sunt) quoties occasio oblata, legnem inerteque se præbuit. Quo tempore Pontifex renunciatus est, Japonis Oratores, novum ab Urbe condita spectaculum, in Romano Jesuitarum hospitio versabantur. Hos a Gregorio benignissime nuper acceptos, ac de futuri Principis (ut fit) erga se voluntate sollicitos, confestim Sixtus tanta charitate complexus est, ut omnem iis de amisso optimo parente ac patrono mærorem absterferit. Quippe ad interiorem consuetudinem comiter admissos in Lateranensi pompa proximo sibi loco dignatus est. Dein ad Altaris ministeria regium in morem adhibitis, sua ipse manu (quod ii plurimi fecere) Christi corpus impertiit: postremo ad omnem virtutem ac pietatem gravi adhortatione accensos, ac magnifice insuper donatos, immortalem habentes gratiam abs se dimisit. Illi cum honestiore quam venerant, comitatu, Lauretana peregrinatione suscepta, perque eam occasionem aditis clarissimis Italiæ Urbibus, & quam effusissimo studio omnibus locis accepti non solum, sed pretiosis etiam muneribus aucti, consensu in Genuesi portu triremibus, biennii fere navigatione incolumes in patriam revertere. Ibi dum certatim apud populares quosque suos mira quædam de Pontificis Maximi beneficentia, de Romanæ Ecclesiæ sanctitate, de Italiæ pulchritudine, splendore, moribus, opibusque, de Hispani Regis (quem in reditu revifere) clementia, & majestate deprædicant; non parvo scilicet in illa regione, Christi servitiis, ad eam excolendam vineam, firmandos in fide neophytos, propagandum longe lateque Evangelium, adjumento fuisse. Eodem Pontificatus initio Sixtus, infirmitatis humanæ se conscium, ac tantæ molis minime capacem affirmans, peramplo Jubilæo proposito, ad sustinendum omnia regendi onus, & rite exequenda cuncta Reipublicæ munia, populi Christiani universi vota precesque vehementer expetiit. Et is erat sane status rerum, & conditio temporum, ut ab ejusmodi curatione sanum quemlibet, nec ope Divina subnixum, abstertere posset, vel difficultas operis, vel periculi magnitudo; cum haud pridem laceris, ac miserandum in modum avulsis a capite nobilissimis Ecclesiæ membris, reliquæ partes, atque ipsa tum in primis Gallia, Italiæ, Hispaniæque contermina, laboraret. Ejus morbi causas & incrementa paucis expediam. Posteaquam Lutherii, dein aliorum, &

Cal.

Calvini præsertim scelere septentrio viciatus est; flagrante per ea tempora maximos inter Europæ duos Reges exitiali bello, cum e Germaniæ finibus propinqua subinde auxilia conducere Gallus, & quorum egebat ope, iis, & vivendi, & opinandi licentiam permittere cogere-tur; serpere paullatim dira lues, & per mutuos usus proxima loca, mox etiam interiores nationes, nec modo multitudinem, sed etiam nobilitatem ipsam, atque adeo quosdam e Regia stirpe cœpit inficere. Non fefellerat orientis mali pestilens afflatus Henricum Regem cognomine secundum: atque ut e Christianissimi titulo, quem gerebat, Catholicæ fidei, apprime retinens, & e specula cui insisteret, in posterum erat valde prospiciens; ad ea semina quamprimum elidenda omnes animi ingeniique intenderat vires. Sed ira procul dubio Numinis in Gallicam rem, dum pacta ob id ipsum cum Hispano Rege per Filiæ nuptias pace, ludicra certamina ipsemet inconsultius celebrat, per male obertam cassidem letali vulnere accepto, afflictam Galliam, viduam Catharinam, & ex ea, præter feminas (quibus nil juris Gallicum in Regnum est) virilis sexus tenera admodum ætate reliquit filios quatuor. E quæis Francisco quartumdecimum agenti annum, paulo post suscepta gubernacula non sine veneni suspitione defuncto; Carolus generosa indole puer non plus undecim natus annos, trienni matris, ac procerum tutela successit. qua finita protinus ad hæreticos tollendos incubuit: atque uno die, qui fuit Sancto Bartholomæo sacer, uno nuncio pluribus locis ingentem ipsorum numerum, in iis Gasparum Colignium rei maritimæ Præfectum, insigni audacia & calliditate virum, nova & atrocia meditantem, e medio sustulit. Quamquam hæc tam præclara Caroli pietatis, atque sinceræ in Ecclesiam fidei documenta, non defuere qui secus intepretrarentur. Siquidem habeo locupletes Auctores, qui cædem ejusdem nequaquam a studio religionis, aut ab hæreticæ pravitatis infectione profectam affirmant. Sed Colignium cum super insitam vafritiem armis opibusque præpolens, atque apud Regem gratiosior in dies cuncta paullatim in se traheret; instigantibus æmulis, Catharinæ jussu, plumbea glande petitem, fortuita corporis declinatione læva manu brachioque ictum excepisse: decusso hinc pollice, & vulnere super cubitum accepto, cum inter manus in hospitium delatus, doloris vi, & intemperantia linguæ fremere ipse cum suis, inque caput Regis, ac Principum querimoniis interjiceret minas; de sanctioris Concilii sententia (quando ambiguis in rebus occupasse tutius) immixtis concubia nocte prætorianis in lectulo trucidatum. Dein Parisiis, & in aliis civitatibus magnam nefariæ sectæ partem subita occasione deletam: a conficiendis reliquiis vel damni, vel invidiæ metu abstutisse Carolum, accedente præsertim auctoritate matris, quæ negotiorum supra quam credi posset, appetens, per speciem lenitatis ac pacis, residere semper aliquid in Regno turbidi, haud

haud ita moleste ferebat. E reliquis duobus filiis Henricus mortuo parenti cognominis, ad Poloniae sceptrum perhonorifico decreto Gentis adscitus. Herculi (quem postea in fratris, avique memoriam Franciscum appellarunt) Alenconiensis Ducatus est attributus. Verum ne ipsi quidem Carolo diuturnum fuit Imperium. Circumacto vix a Coronatione decennio, in ipso ætatis flore decessit. ad Catharinam e testamento, dum Henricus e Polonia revocatur, plena bracteatae felicitatis, invidiosi laboris administratio rediit. Crebra quippe interregna, vulgi protervia, tutelares discordiæ, procerum ambitio, dum plebis commoda, & religionis causam suæ quisque cupiditati prætendunt, ita cuncta divina pariter, & humana fœdaverant; uti florentissimi paullo ante Regni vix faciem agnosceres. Passim novæ sectæ, passim latrocinia, deferi agricultura, tolli negotiatio, coitiones, atque conspirationes in Præfectos, & Magistratus, ac Regem ipsum erumpere, judicia legesque subverti, exteræ gentes ad Civium perniciem precibus ac præmiis evocari, diripi, & solo æquari templa, Virginum septa nefarie pollui, Catholici homines, & Clerici præsertim per inauditos cruciatus pecunia, vitæque spoliari, opulenta Sacerdotia militibus, feminisque promiscue addici, denique nulla species, aut clades belli civilis abesse, veluti contacto omni Franco sanguine; rabie paucorum funestam dominationem ex patriæ casu petentium. Hac tanta rerum perturbatione commoti (ut æquum erat) Romani Pontifices, alique bene de Republica sentientes Reges, ac Dynastæ, ne latius vagaretur incendium, Galliæ in extremum adductæ discrimen, suppetias certatim ferre non dubitaverant; quarum beneficio collatis aliquoties cum hoste signis, felici semper exitu dimicatum est. Sed eorum culpa, qui se humano sanguini parcere, verbo jactabant, revera imperandi libidini moderari, secum esse, & otium pati non poterant; intempestivis induciis, iniquis conditionibus, mediis consiliis (quæ rebus magnis atque præclaris inimicissima sunt) corrupta subinde victoria, & præcisa dumtaxat, non evulsa letalis planta, porro fructuari non desit. Ad ejusmodi curanda vulnera Henricus (uti dicebamus) e Polonia propter matris, & amicorum literis accersitus, firmo in Italiæ finibus exercitu comparato, si celeritatem adhibuisset, perduelles, vel si præfidentes, obterere, vel metu perculsos ad fidem, officiumque facili negotio redigere potuit. Sed in itinere adulatorum copia circumfluens, dum ludis, choreis, conviviis indulget, magnæ hostium parti, & animos ad resistendum, & ad occupandas validas præfecturas, nova concilia celebranda, & subsidia undique colligenda spatium præbuit. Inde non uno loco recrudit bellum. Id Henricus per Legatos administrabat. Ipse ad capeffenda Regni solemnia Rhemos profectus, ubi primores, qui nondum mutaverant fidem, ad Sacramentum adegit, uxorem sibi e Lotharingia gente delegit, nequaquam absurde certissimum in legi.

legitima prole sibi præsidium statuens. In eam rem tota sua ditione sacrificia, & supplicationes indixit: pretiosa donaria ad celeberrima Europæ templa religiose transmisit: neque tamen iccirco voti compos efficitur. Hinc & ipsius, & Alenconii fratris orbitas, & infirma corporis habitudo, remissa armorum studia, & numquam intermissæ voluptates, paullatim in contemptum, mox etiam in odium Regem adduxere. Accedebat ad irritandos animos nimia quorundam apud eum gratia, qui incertum quibus artibus, aula, & Rege potiti, cuncta suo arbitratu circumagere putabantur. Id cum alii, tum vero nobilitas, & ut quisque Regem arcta cognatione contingebat, ferebat ægerime. Jam Cleri, & Populi (qui reliqui duo sunt Ordines Gallicani) ab Henrico mentes abalienaverat crebra, & multiplex tributorum, & decimarum exactio, non ad alendos tantum exercitus, sed etiam ad prodigas largitiones, & aleam, & sumtus minime necessarios: itemque Sacerdotia (uti supra memoratum est) temere ac citra auctoritatem Summi Pontificis distributa, & super hæc Sacri Concilii Tridentini, quod erat unicum malis remedium, promulgatio per summum nefas & obstinationem impedita, & vetera inter Galliæ Regem, Regnum, & Romanam Ecclesiam pacta conventa, nullo æqui, vel iniqui discrimine violata. Interea quamvis a Regiis, quoties ad certamen ventum erat, secunda semper fierent prælia; profligari tamen hostis, & debellari non poterat, propterea quod in singula trophæa per incommodos arbitros, & importuna de more feri colloquia, & indignantibus frustra bonis, a victo leges accipi consueverant. Ita, quidquid acies, ac ferrum, ad fanciendam Regis majestatem, ac refrenandas improborum cupiditates adstrinxerat, id continuo fucatæ concordiae fœdera, & ante tempus quæsitæ clementiæ gloria relaxabat, ac simul ad reparandas vires, & nova ineundi consilia, æmulis Henrici præbebatur occasio. In iis longe ante alios eminebant patruelles Henrici Borbonii duo; Navarræ, & Bearnæ alter; Condeanis alter imperitans. Hi propinqua cum Rege affinitate conjuncti, parentum culpa Calvinistarum, quos alio vocabulo Hugonotas vocabant, moribus ac placitis innutriti, Colignianæ cædi Caroli miseratione superstites fuerant, ac nondum erroribus ex animo per saniores doctrinam evulsis, malo minisque coacti per supplices ad Gregorium XIII. epistolas, & Oratores in gratiam cum Ecclesia Sacrosancta redierant, haudquaquam sincera mente. Quocirca post obitum Caroli, ut primum abiit metus; Hugonotis, quorum ope maxime nitebantur, extemplo sese reddiderant, in Regni successionem imminentes, atque ubi cetera provenissent, ad extremum (ut fit) inter se dimicaturi. Adversus horum conatus Catholici proceres, & Civitates aliquot per clandestinas legationes accito in partem Hispano Rege, occultum primo, dein patefacta conjuratione apertum in oppido Janvilla fœdus inierant; molientibus

bus præcipue Lotharingiis fratribus, Aloysio Cardinale, Henrico Guisio, Carolo Mayneo, & Dynastis, cujus familiæ quamquam haud ita pridem e Lotharingia profectæ (ex quo etiam in Gallia novi homines habebantur) tamen ob generis claritatem, & res præclare gestas, magna erat apud Regem, & omnes Ordines auctoritas. Hi ad colligendam probitatis & justitiæ famam, persancte affirmabant, sibi nihil esse prorsus in tali conspiratione propositum, nisi ut avitam Religionem ab novatorum impudentia, Regis vitam ac dignitatem a consceleratum infidiis tuerentur; Cleri ac populorum fortunis, juribus, ac saluti vel cum aperto capitis periculo pro sua parte consulerent. Hæc, & alia id genus propalam Guisii: tametsi non desunt, qui eisdem causæ publicæ prætextu sumtis armis, mortuo nuper Alenconio, tyrannidem affectasse contendunt: quod nos haud ita compertum, in incerto relinquimus. Hoc fermi loco erat Ecclesia Gallicana, cum Sixtus pascendo curandoque Christiano Gregi universo præpositus est. Atque ut sui muneris vel in primis intelligebat esse, contactus morbidus pecoris a credita sibi caula procul arcere; infimis fœderatorum precibus, & Regis Philippi supplicatione hortatuque haud ægre se adduci est passus, ut Hugonotas, eorumque duces cælestibus armis insectaretur, atque ab omni fidelium communione separaret. Ergo Henricos, quos dixi duos, tum maxime rebus gerendis, & opibus omni ratione firmandis intentos, diri anathematis horrendo fulmine perculit, & omni jure successionis regis spoliatos patriis insuper ditionibus exuit, popularibus utriusque sacramento, quo se de more illis obstrinxerant, Apostolica auctoritate solutis: præpropere fortasse consilio, cum illi propositis non uno loco, ac Romæ præsertim edictis incognita causa damnari se, paratosque ad Catholicam Religionem profiterentur, ubi primum sibi per idoneos doctores de illius, quam à primis annis imbibierant, vanitate constaret. Sane Sixtum facti postmodum pœnituisse fama est, reputantem a bono parente non statim ultima experienda; molliter imo tractanda animorum vitia, revocandam prius omni arte & patientia vel dubiam vel etiam in pejus inclinatam filiorum indolem: sæpe mora sanari, quæ exulceret alioqui festinata severitas. Quæ monita in rem præsentem egregie convenisse, eventu ipso (quemadmodum in loco reddemus) postea comprobatum est. Dum hæc ad fulciendas Galliæ ruinas a Sixto geruntur, Henricus Tertius, cui suspecta multis de causis erat Janvillani fœderis male auspicata conjunctio, novo edicto rescissis pacis iniquissimæ legibus, quas in proximo conventu magna existimationis jactura firmarat; Navarræ per Legatos ac literas ab Hugonotarum partibus ad se pellicere, atque ad arces & oppida sibi reddenda, quæ valido præsidio locis opportunis infederat, inducere frustra tentavit. Condæus post aliquot certamina cum Catholicis vario eventu commissa, dilapso demum ob dilata stipendia exerei-

tu in Angliam trajecit: inde pecunia, & classe ab Regina adjutus, Rupellam, quæ tum erat præcipua hæreticorum sedes in Oceani litore, sese recepit, atque ibi renovato incassum aliquoties bello, ad extremum domestica fraude (ut fertur) interiit. Eodem Sixti Pontificatus initio apud Belgas (quam item Ecclesiam ex Angliæ, Germaniæque commerciis Calviniana rabies fœda laceratione discerpserat) nonnulla rerum meliorum spes affulgere visa: post asperas aliquot pugnas, & longam ac periculosam obsidionem, Alexandri Farnesii, summi Imperatoris virtute consilioque recepta demum Antuerpia, nec non sine cruore Nimega, Bruxellis, atque Mechlinia; hæretici omnes ni resistere, ex earum Civitatum finibus intra certam diem demigrare jussi. Post hæc in Germania quoque ejusdem Alexandri ductu operæ pretium factum. Novesium est oppidum, paullo infra Coloniam Agrippinam ad Rhenum. Id oppidum hæretici paullo ante surreptum, pulsus Catholicis, non levi præsidio tuebantur. Clovethus præerat, & spectatus bello, ceterum ex intima Calvinii perfidia. Ad eam Urbem recipiendam Farnesius, Herneſti Archiepiscopi Colonienſis rogatu, cujus in ditione erat locus, Philippi Regis mandato (qui Herneſto & propter æquitatem cauſæ, & propter sanguinis conjunctionem impense favebat) cum exercitu profectus, occidente jam sole castra posuit. Postridie Hispani aliquot ad contemplandum in proximo Castellum ab hoste desertum, audacius proveſti trans amnem Norſum, qui ab Oriente decurrit, cum in egregiam hostium manum repente incidissent; quadraginta e suorum numero occisis, aliis in servitutem abstractis, pleni ignominia mæſtitiaque in castra se recepere. Neque lætior fuit Italiæ nationi ſucceſſus; quippe dum ab ſecundis rebus (ut ſit) negligentius vallo ſe muniunt, ſubito Calvinistarum incurſu (delecti ad trecentos eruperant) munitionibus propemodum exuti ſunt, fortibus aliquot viris in eo tumultu deſideratis; & in iis Julio Grimaldo strenuo bellatore, & claris in Urbe Genua orto natalibus. Ægre damnum utrumque paſſus Imperator, extemplo tormenta muralia duo & triginta adverſus Urbem tribus locis opportune locavit; ac priuſquam oppugnationem aggrederetur, Caduceatorem de more præmiſit, qui incluſos ad incruentam deditionem hortaretur: ipſe manibus ita ſucceſſit, uti colloquentium verba clare perciperet. Petebant Farnesiani, uti Clovethus juſto domino Colonienſi Archiepiſcopo Urbem illico redderet, ipſe cum præſidio incolumis abiturus. Contra Calvinistæ affirmare, Novesium eſſe Ceſareæ ditionis; nihil ſibi cum Herneſto negotii: ſi faceſſeret ille, ſibi cum Alexandro facile conventurum. Dum hæc & ejuſmodi ultra citroque jaſtantur, Calvinistæ aliquot præclarum facinus rati, ſi capitalem ſectariorum hoſtem e medio ſuſtuliffent, directis in ipſius Alexandri caput ex occulto fiſtulis, approbante Clovetho, plumbeæ grandinis procellam repente effuderunt. Affuit inſonti

Numen ; quippe non is modo , sed nullus omnino ex ejus comitatu læsus : ac ceteri quidem ab infesto fragore statim in fugam averfi ; Farnesius omnium postremus , haudquaquam citato gradu , salva majestate recessit intrepidus , laudes gratesque agens immortalī Deo , deque tam detestanda perfidia secum agitans . Jamque omnibus ad oppugnationem expeditis , tamen inclinato in vesperam die , a quatiendis mænibus abstinit , ne Calvinistæ per tenebras novum repente pro diruto reficerent murum ; simul animi dolorem alte premens , ut obseffos intentos in spem pacis ad belli munia redderet segniores , iterum misit , qui de conditionibus agerent . Tum vero Calvinistæ sublati animis , & non sine caussa rati post tam atrocem acceptam injuriam nihilominus ab Alexandro pacem optari ; contumaci responso laxiorem diem ad deliberandum , atque ad Cæsarem ipsum per literas consulendum exposcere ; quidam etiam Farnesii postulata per lasciviam irridere . Uti postera dies illuxit , Hispaniæ Patrono Apostolo sacra ; diremto colloquio trifariam cœpta , neque intermissa diverberatio , quoad turres aliquot , ac bona pars muri procideret . Tum demum fracti defensorum spiritus , & ad petendam Imperatoris fidem , ac testanda nova pacta , quamquam imminente jam nocte , prodibant : neque supplices (qua erat clementia) aspernabatur Alexander ; cum inter eam cunctationem indignantes Italici , & Hispani cohortes aliquot tam certa victoriæ præmia sibi e manibus eripi , injussu per apertum ruina iter , duobus propugnaculis occupatis , magnam hostium stragem paucis obfistentibus edidere . Prima dein luce exercitus universus irrupit , irarumque plenus , ad cædem rapinamque discurret . Calvinistæ abjectis armis partim occisi ; partim dum scæda fuga e muro sese præcipitant exanimati plerique ; partim cum e fossa in siccum evasisent , ab regio equitatu , qui Urbem corona cinxerat , intercepti . Ex oppidanis imbellem turbam Alexander , ne injuriæ militum pateret , in sacras Ædes tantisper , dum furor defæviret , inclusit : ac nihilominus captos e Civibus aliquot Hernestus , qui Alexandro aderat , pro charitate pastoralī redemit . Clovethus juris humani divinique contemtor , cum levi ictus vulnere superesset , Imperatoris voce jussus interfici . Ad eum , si qua fieri posset , in extremo saltem spiritu ab insania revocandum missus a Castrensi comitatu Sacerdos , fucum fallaciamque Calvinī variis demonstrationibus aperire , ipsumque Cloverthum ad animam , quoniam ætærat erat de corpore , ab interitu revocandam precibus , monitis , minisque adhortari aliquandiu perseveravit . Ille cum salutare nihil ad aures admitteret , ab ultima desperatione sopiendo rationis usui merum poposcit : haustoque ingenti poculo , ad sempiternos cruciatus una cum ceteris abiit . Interea Hernestus dum refovendo intentus gregi , hospitium subit ab incolis monitus ipse , & alii Principes omnibus testis inevitabile incendium adesse ; vix dum postea pedem extulerant , cum

cum e tormentario pulvere, quem perditis rebus hæretici subterraneis ædium locis (eæ ferme ligneæ sunt) appposito ignario fomite abdiderant, atro mixtæ fumo erumpentes flammæ triste visentibus vel e tuto spectaculum præbuere. Neque tamen Urbs iccirco in longum tempus everfa: & loci opportunitas, & profugi redeuntēs, & excitata raptim ædificia, brevi pristinam frequentiam, ac celebritatem Novæ reddidere. Ab ea victoria Farnesius haud longo intervallo petiit Bergas oppidum exiguum, sed munitum egregie, & firmo Calvinistarum præsidio custoditum. Inde item Farnesius hæreticos pellere aggressus, quia res egebat mora, nec dignum tanti operis pretium videbatur, ad pacandam aliqua ratione provinciam, vel profligandas omni conatu belli reliquias in Belgium rediit. Haud æque feliciter in aliis Orbis terræ partibus hoc anno Christiana gesta res est. Petrus Toletanus ad vastandam Africæ oram septendecim triremium classe profectus ad Cercinam insulam, nobile quondam Annibalis diversorium applicuit. Plano situ, & fertili, & nullo munimento septus est locus: agricolæ & pastores inhabitant; circumquaque fyrtes, ac breviter duobus dumtaxat euripis, ad Asachem oppidum continentis, decem ferme leucarum intervallo transitum præbent. Ad eos euripos occupandos, ne cui ex insula pateret effugium, Petrus levioribus navigiis Marcellum Caracitolum Neapolitanum celeriter misit cum tironum manu paucis veteranis immixtis, etiam atque etiam admonitos, uti ne ante acceptum signum in terram exscenderent, caverentque ab insidiis. Illi cum hoc mandato profecti non longe in umbra palmeti moram trahentes aliquot Insulanos aspiciunt semiermes, velitaribus tantum hastis, & latioribus, cultris instructos: ea illecebra ad prædæ spem irritati classici, nequicquam abnuente Marcello, obtestanteque, ne Imperatoris contemnerent jussa, relictis in salo navigiis, in terram inexplorato desiliunt. adversus eos protinus Afri, quamquam multo pauciores ultro sese ferociter intulere; qua tam repentina obstupescit audacia Toletani, & ex denunciato veriti, ne major hostium numerus in proximo subderet, omissis, ad expeditiorem fugam, armis, extemplo ad naviculas terga verterunt: neque eas adepti, quod æstu recedente longius aberant, in ipso litore inermes, ab insequentibus ad unum omnes interfecti, inconsultæ cupiditatis, ac sprete ducum imperii meritis pœnas dedere. Toletanus tam fœdo atque infausto initio exterritus re infecta recta in Siciliam, atque inde ad pervestigandos piratas ora lustrata, Neapolim abiit. Eadem tempestate Franciscus Dracus insignis Archipirata, cum ex Angliæ finibus anno priore, classē duobus millibus Epibatarum instructam in Occidentem eduxisset; ad Bajonias Insulas sæva procella jactatus, ad Vicum (id loco nomen) accessit; ac navi, in quam incolæ pretiosissima quæque sacrarum ædium instrumenta, in iis argenteam magni pondēris Crucem, hostium metu condide-

rant,

rant, sine labore potitus, in conspectum regionis processit; quam Galatiam Hispani, ut alias ferme novi Orbis partes, de patria terra nominant. Obibat ea litora, cum haud magna equitum peditumque manu regius Prætor: ab hoc aleam prælii formidante, Dracus, non aquationem modo, sed varios etiam commeatus æqua mercede impetravit. Hinc ad Insulam Jacobæam e regione Hesperidum classe refecta, Canarias adiit, & ex iis nequicquam tentata Palma, ad Urbem Dominicanam processit in Hispaniola sitam, decem fere millia passus introrsus a mari, caput Insulæ, sedem Episcopi, juridico præterea conventu insignem, & loco ad tranſvehendas Americæ opes idoneo; verumtamen & longinquitatis & commeantium Regis classium fiducia non magis arte, quam natura munitam. Eo audacius Angli, dum classem Dracus tuetur, in terram egressi fere mille ducenti Carlillio duce obvios ad explorandum Hispanos equites centum & quinquaginta momento fudere: dein longitudine viæ, & sabuli tenacitate superata cum volitantia undique tela depressioribus locis humi strati ex arte vitassent; concitato protinus impetu ne Hispanis ad replenda tormenta spatium foret, in hostes impressionem dedere: instantesque, & immixti cedentibus, pariter in Urbem irrupere; ac foro maximo confestim occupato, & subitariis munitionibus raptim excitatis, ibi tandiu tenuere sese, quoad incolæ; quotidianis eorum excursionibus rapinisque, & incendiis fatigati, desperato aliunde (cum sibi quisque timeret) auxilio, cum Anglis, uti pacato agmine excederent, magno auri pondere tranſegerunt. Dracus tam felici successu rerum elatus continuo datis in meridiem velis Carthaginem petiit, prænobile emporium in Boreali plaga regionis Americæ, neque ibi Draci spem plane fefellit eventus. Nam, etsi oppidani Classis Anglicanæ fama præmoniti, locum per se munitum omnibus insuper ad propugnandum necessariis rebus instruxerant; tamen hic quoque tanta fuit pervicacia hæreticorum, tanta rapiendi aviditas, ut in summis difficultatibus, tamen ab incepto non ante destiterint, quam semiruta machinis Urbe, cives ad repræsentanda sibi centum ac decem auri millia per vim adigerent. Inde consilium erat Draco interiora Americæ penetrare, atque ad ipsum nomen Dei, quod appellant, & Panamensem isthmum, qui vastissima duo jungit maria, victrici classe pertingere, beatasque auri, & argenti fodinas, si occasio daretur, invadere. Sed magna militum, & nauticorum parte, variis belli, marisque casibus, & contagiosis præterea morbis absumpta, omisso ad præsens incepto, plenas omnis generis præda naves, circa Autumni initium, frementibus incassum Hispanis, atque ipso vel in primis Philippo Rege, ovans in Patriam reduxit. In Japoniis vero Insulis (quando Antipodas quoque Romana historia comprehendit) æque male pugnatum a Christianis. Bungi Regnum ad fidem Christi maxima jam ex parte conversum, a Saxuma-

no Tyranno idolis ad insaniam dedito, diris modis, igne ferroque vastatum, Urbes captæ, & direptæ; Francisci Regis exercitus dum obfessæ Fiungæ arcis opem ferre conatur, ingenti prælio superatus est. Hæcæ temporarias Ecclesiæ clades spiritalia magno cum fenore lucra pensarunt. In ipso Japone variis locis Ethnici permulti, agnitis ex verbo Dei, patriæ doctrinæ deliramentis, mystico regenerationis lavacro expiati. In citiore item India multi quam maximo cum apparatu atque frequentia celebrati baptismi: in iis memoranda fuit Brachmanum aliquot (hoc nomine magistri superstitionum Indicarum vocantur) cum uxoribus, filiisque conversio. Accessit nobilissimus adolescens ex perantiqua Regum Balagatæ progenie. Auxit neophytorum multitudinem renovatum Regis decretum, uti non modo Ethnica principia, si Christum profiteri animum inducerent, libertate donarentur; sed etiam impostorum venalities, non nisi a Christianis, qui eos ad rectam fidem informarent, emi liceret. Hæc in Oriente. In Occidentibus autem partibus, & in ipsa Mexicana regione persuasum multis, qui adhuc silvarum in latebris, & concavis montium agebant victu ferino, uti conjunctis casis in unum coalescerent: ii denique mitigati, certisque finibus ac legibus septi, jam intelligunt utilitate communis societatis salutem singulorum & commoda contineri. Nec desuere qui affirmarent immanem strepitum fremitumque auditum ab se, visas etiam alicubi Dæmonum cohortes horrendo cum ululatu & indignatione querentium, quod ab ignotis homuncionibus ex ea provincia exigerentur, in qua sibi cælestes honores cum exquisitissimis cærimoniis habiti ad id tempus fuissent. In eadem Peruana regione mense Quintili, celeberrima in Urbe Lima, sub solis occasum, tellus moveri cæpta: tremore dein paullatim increbescente, vibrari eadem ac sursum tolli mortales, tamquam in quassata fluctibus navi insana cum agitatione volutari ferrique, in singula momenta metu chasmatum inhorrescere. Terrestrem motum subsequutus extemplo maritimus. Terrifico aspectu pelagus intumescens trecentos amplius passus in continentem irrupit: ædificia, quæ in portu erant, cuncta proruit: merces magna ex parte corruptæ: aliquot homines obruti: ab ea tempestate aliquandiu nemo se domi tutum putavit. In hortis plateisque passim tentoria figebantur. Hæc irati signa Numinis haud paucos ab licentia & luxu, ad Christianam sobrietatem officiumque revocarunt. Limensis Civitas, quod ea clades sub Visitationem Dei Genitricis inciderat, anniversariam illius festi celebritatem solemnem cærimoniæ, jejuniique, ac pervigilii voto in posterum sanxit, ipsamque Virginem Dei Matrem sibi stabilem, propriamque patronam, ac tutelarem adoptavit. Per eosdem fere menses in Oloanda Æthyopici maris insula, multiplicibus nuper dæmonum fraudibus obcæcata, passim Crucis trophæa, & ritu Christiano aræ, templa excitata. Huic insulæ in Atlantico litore vicina est Corimba, regio

regio latissime patens, feraci solo, frequentibus pagis: itemque Angola purissimi argenti venis uberrimis, inclyta. In utroque eo tractu magnæ ad Ecclesiam accessiones factæ, præclarosque processus habebat Evangelium Christi; cum grave repente bellum exortum ab Æthyopibus, qui interiora tenent loca, Europæosque divitiarum avidos, a foderarum accessu jampridem arcere conantur, ad sexcenta millia armati convenerant: iis oppositi Lusitani ferme ducenti non plus dena sociorum millia cum signis habebant. Commisso prælio tanto minore Christianorum manû tantæ barbarum copiæ fusæ ac fugatæ; Mariæ Virginis haud dubie beneficio, itemque Apostoli Jacobi, quorum utriusque in tutela neophyti sunt: quorum præsentem dubiis in rebus opem ante jam senserant, tum ab iisdem Christianis exiguo numero duodecies centena hostium millia profligata sunt, affirmantium initio pugna, admirabili specie feminam clarissima circumfusam luce, & seniore ejus comitem stricto gladio, ante signa sublimes, repentinum sibi terrorem atque consternationem intulisse. Hæc & alia hujusmodi tam longinquis e locis fabulosa fortasse quis dixerit. Ego quidem literis gravium virorum, qui semet earum rerum spectatores fuisse testantur, fidem abrogare non ausim. Jam in Anglia, nostri utique Orbis, in ipso domicilio, & fomite seditionis atque malitiæ per occultos piorum cœtus haud pauci ex impurissimo cœno hæreticæ colluvionis extracti. In Gallia cum edixisset Rex universo Regno, uti Calvinistarum furor, non resipiscerent, proscriptione, & exilio mulsetaretur, sua sponte seu malo coacti, semet Ecclesiæ reddidere quamplurimi: multis etiam locis, Episcoporum diligentia pestilentes libri e privatis ædibus, aut propoliis, in medium protracti, ac flammis exusti palam. Sublata conciliabula, & quoad fieri potuit, nihil in vinea Christi relictum, quod Catholicis institutis, & revirescenti avitæ religioni posset officere. Jam in Septentrione per publicas conciones, privataeque disputationes magna hominum vis a diversis erroribus in rectam unius fidei semitam ingenti bonorum gratulatione traducti. Ex eo numero duorum præcipue pœnitentiæ, & pietatis ardor enituit: quorum alter in Poloniæ Urbe Pultovia, quo testatior esset correctio pravitatis, in qua miser ad eam diem insigni cum obstinatione perstiterat; sua sponte palam Crucifixi figura sese resupinum humi prosternens, tanto & suo, & spectantis populi motu hæresim est execratus, uti dubium sit, plures ne effuderit lacrimas ipse, an circumfusæ multitudini excusserit. Alter Lithuaniz Procancellarius (qui amplissimus est in ea regione dignitatis gradus) cum in Græci schismatis, aliarumque sectarum euripo, incertus animi aliquandiu fluctuasset, Vilnam sese denique contulit: aditoque legitimo Sacerdote ad Catholicam fidem ita est informatus, ut post sacram Confessionem publice sumto Christi corpore, ad restituenda cælestium templa, juvandos inopes censu, locupletes exemplo

retrahendos in æternæ salutis iter æque externos ac populares omni studio & alacritate sese contulerit. Illud quoque Dublini permirum evenit. Propositis ad coarguendam hæreticam improbitatem inscitiamque publice thesibus, in iis, unum esse in Christo Domino Pastorem, ac moderatorem humani generis in Ecclesia constitutum; invitati a Catholicis Doctoribus Ebionitæ præsertim, qui sedem suæ impietatis in ea potissimum Urbe fixerunt, cum & populi & nobilitatis frequens populus convenisset; commissa jam concertatione, severo quodam supercilio procedit in medio unus e delirantium magistris (superintendentem ad evitandam Episcopi vocem appellant) is ad singularis cujusdam pietatis ostentationem, ante omnia sublatis in Cælum oculis, clara voce ab immortalis Deo est precatus, uti disceptantium uter sciens falleret, atque obfisteret veritati; huic repente scelestum os æterna majestas obstrueret. sub eam obtestationem inito prælio, dum is adversus fundatissima Ecclesiæ sanctæ decreta, nullo veri, falsique discrimine, ut hæretici solent, qua mutila, qua adulterina e sacris literis jactare non dubitat; ecce sibi subito tremore, & pallore correptum latera voxque deficiunt: est sublatus e sella, justam Numinis vindictam cunctis non sine horrore agnoscentibus, cum in eam ipsam incidisset pœnam, quam sibimet lingua sacrilega nuncuparat. Vulgata continuo per totam Poloniam ea res est: diuque & multorum literis, & omnium sermone celebrata. In Livoniæ finibus paganorum tria fere milia ad Christum adjuncta: vitiati baptismi cærimonix instauratæ in plus mille capitibus: nefarii quoque ritus e vetusta gentium superstitione sublatis; cum enim in siccitate paullo pertinacior consueissent rustici ad eliciendam segetibus pluviam, tonitruo ac fulguri supplicare; interdum etiam avertendi mali ad certas arbores offerre liba, & sacra facere; non sine magno labore persuasum tandem est iis, ut ab ejusmodi cultu idolorum ex Christianæ fidei præceptis abstererent. In Austria præter ceteram multitudinem a pravis opinionibus, vel ab impietate secessione ad instituta, legesque Catholicas longo intervallo revocatam, duo oppida tota Hausechium. & Cremsium pulsus magistratuum jussu pseudoapostolis, quos vulgo Prædicantes appellant, Romanam Ecclesiam omnium Ecclesiarum Principem, ac Magistram agnovere. In Stiria Urbe Græcio, quod est Provinciæ caput, adversus hæreticorum impetus, instructissima bonarum artium, ac disciplinarum officina, Caroli Archiducis munificentia, Pontificis Romani auspiciis, instituta. In Helvetiis Catholici pagi puri ab hæreticorum contagione servati, & libertas Ecclesiastica pluribus documentis Apostolico Nuntio procurante sancita. In Germania inferiore præter cetera sublata vitia, Treverensis, & Moguntini Principum, & Antistitum cura, sagis, veneficisque, & aliis Dæmonum emissariis obviam itum; & in sanandis ægrotis, fugandis lemuribus, periculis amoliendis, haud uno loco, non

aliorum modo mysteriorum Ecclesiæ sanctæ, sed Cerei quoque Agni a Summo Pontifice consecrati divina virtus apparuit. Alicubi cum ad sacram accessuri mensam homines generatim peccata confessi, manipulatim a paroco absolverentur, animadverso piaculo ad propriam & enucleatam quisque confessionem rite se contulerunt. In Herbipolitana Diœcesi inveteratum hæreticæ perversitatis malum vix videbatur posse depelli; sed Episcopi zelus, & operariorum industria, & assiduitas omnia pervicerunt. Oppida quatuordecim non exigua, pagi amplius ducenti, in veritatis ac salutis viam, adjuvante Deo, reducta. capita hominum censebantur ad septuaginta millia: quo factum est, ut qui nuper agri sentibus ac spinis Lutherianæ sementis horrebant, jam tum repastinati & exculi felicibus plantis ac læta fruge nitescerent. Eadem ætate, qua hæc variis Orbis terræ partibus in Ecclesia Dei gerebantur; Gulielmus Sirletus extremum in Urbe Roma diem obiit, vir in quo egregia pietas insigni cum eruditione certabat. Is in Calabria Guardavalle vico Stilenfis agri, medico Patre natus, cum domi sacris prophanisque literis operam accurate dedisset, pergravante fratrum multitudine perexiguo censu, Neapolim primo, Romam inde petiit, omnia sua bona secum portans, & nulla supellectili præter unum Breviarium instructus. Ibi Calcographorum emendandis ob inopiam typis aliquandiu visitavit; hinc ad Joannem Franciscum Ursinum Romanum procerem, sese contulit: mox in clientelam familiamque Cervini Cardinalis receptus, acerrimo ingeniorum æstimatori, ejusque amicis viris ita sese probavit; uti eodem Marcello postea vita functo, ab Successore Marcelli Paulo Quarto in intimam consuetudinem titulo Protonotarii participantis admissus, atque a Pio Quarto denique ad sacrum ipsum Collegium fuerit aggregatus. in quo tam excelsso fastigio cum nihilominus eum de obscurissimis utriusque testamenti aliisque locis æque summi, infimique consulerent, ad finem usque vitæ per viginti annos ita se gessit; ut illum Princeps in publicis difficultatibus fidelem consiliarium atque administrum, in rei familiaris angustiis doctissimus quisque optimum, & parentem, & advocatum agnosceret. Decessit ferme septuagenarius, præter celeberrimam nominis famam, ornatissima quoque bibliotheca relicta. Insequentis anni primordia nobilitavit Margaritæ Austriacæ mors cum aliis nominibus de Ecclesia optime meritæ, tum quod Alexandrum Farnesium edidit, de quo paullo ante dicebamus; & rectæ in Deum fidei ubicumque versatus est column, & sanguinis Italici apud omnes nationes eximium decus. Hæc virili prorsus ingenio mulier, in Belgis Carolo Quinto Cæsare genita, Octavio Parmensium Duci Romæ nupta, ad compescendos in patria motus, Calvinistarum dolis, & scelere nuper exortos, a Philippo fratre destinata, Provinciam

ciam haud ita gravate suscepit; immitissimæ genti sapientia ac lenitate potius, quam ferro suppliciiſve tranquillitatem & pacem, aris templisſque ſuos honores & carimonias utique redditura propediem, niſi præclare cœptis alieno tempore interveniſſent ex Hispania certi homines, cauponari, ac ducere bellum, perque terrorem, & cædes, & exactiones imperium exercere aſſueti peſſimo publico. Quippe cum neque ipſorum errata deinceps Rex, Regiive Prætores ulla ratione corrigere, neque Belgarum, ac præcipue Batavorum efferatas paulatim capitali in Hispanienſe nomen odio mentes, quantalibet manſuetudine, benignitate, clementia in hanc uſque diem flectere, aut omnino mitigare valuerint. Inter hæc ab aliquot Germaniæ Civitatibus hæretica pravitare ſeduſtis, itemque ab Joanne Caſimiro, aliſſque Tyrannis, qui contacti Eccleſiaſtica præda inexpiabiles cum Romano, ideſt cum Summo Pontifice, geſſerunt inimicitias Legati ad Henricum Tertium advenere. ii prima ſalutatione peracta, ſuorum extemplo mandata edidere, Germanico ſeorſum, & Gallico ſermone conſcripta: in quibus erat: ſuæ quidem modeſtiæ non eſſe, alienis negotiis obtrudere ſeſe, & in conſilium non accerſitos venire; attamen pro ea neceſſitudine, & charitate, quæ inter eos intercedat, qui nomine Chriſtiano cenſentur, proque ea amicitia, quæ ſibi majoribusſque cum Gallico ſanguine ſemper fuerit; ſatis mirari non poſſe, cur tanta ſapientia & æquitate Rex, violatis conditionibus pacis, quas ipſemet ſolemni paullo ante ſanxerit ſacramento, funeſtum repente bellum indixerit iis, a quibus nulla recenti injuria laceſſitus, nulla contumacia provocatus, omni ſubmiſſione, obſequio, diligentia cultus ſit. Cur ſinceri Evangelii, & priſcæ diſciplinæ aſſertoribus attributa nuper variis locis templa per vim eripiat? Cur Dei verbum, impolluta myſteria, innoxios cœtus, propoſita capitali pœna prohibeat? Utique nihil eſſe tam Chriſtiano nomine dignum, quam promiſſorum, interpoſito præſertim jurejurando, conſtantiam & fidem; hoc uno vinculo privata commercia, publicas poteſtates, atque judicia, totius denique generis humani ſocietatem, & fœdera contineri. Contra nil turpius, nil pernicioſius, aut deſteſtabilius eſſe perſidia: quin eum potius uti bonum paſtorem deceret, afflictiæ Galliæ miſeratio caperet? cur tot fortiſſimis, & clariſſimis Viris per mutuas cædes orbatam omni ſemine virtutis, ac ſobole nobilitatis, per novas inſuper clades vellet exhaustam? Hanc adeo ſubitam rerum immutationem tamque periculofa diffidia probe intelligere ſeſe nequaquam ab optima Henrici mente, ſed a paucorum orta cupiditatibus, qui publicæ (ut ſit) quietis, ac ſecuritatis obtentu ſuam augere potentiam, Regi nova jura, legesſque præſcribere, deſignandi præmatura electione ſucceſſoris neceſſitatem non vereantur imponere; quorum ille, ſi artes pro ſua prudentia, minus pro poteſtate contemnere, paciſſque & otii perturbatores coercere in animum inducat; non deſu-

turas illi, præter Numinis præsentiam, totius quoque Germaniæ opes, & auxilia: sin improbis suasoribus patulas præbere aures, & bene de Valesia Gente deque Republica meritos populares, metu supplicisq; & proscriptionibus divexare pergat; videat etiam atque etiam, ne in unius gratiam Romani Ianistæ (cujus avaritia, & dominandi libido sit inexplebilis) tot fidelissimas nationes, & se, Regnumque irreparabili ruina pessumdet. Hæc monita, & contestationes (uti dicebamus) consignatæ literis, recitatæ ad verbum, ac traditæ Regi, quas ille haud magno assensu percepit. Curiosa, & procax, & subdola visa legatio. itaque brevi spatio sumto, Germanis item de scripto, per apparitorem in hanc ferme sententiam responderi jussit. Sibi Dei munere ita concreditum esse totius Galliæ sceptrum, uti ad Regis nomen, Christianissimi quoque & Primogeniti Sacrosanctæ Ecclesiæ filii cognomen accesserit. hac tam perhonorifica præscriptione se prorsus indignum fore, nisi quæcunque Romanis ritibus, & Apostolicæ doctrinæ adversentur, e suis finibus, vel omnino tollenda, vel certe quam longissime exterminanda curaverit. Quod ad violandum pacis edictum attineat, quæ in tam vago, tamque multiplici rerum humanarum actu publice discernantur, non clavo statim adamantino, fixa & immota censerit. Principum placita, seniorum consulta, ordinum scita, locis, temporibus, eventis aptari. Ad hæc demirari sese, cur Joannes Casimirus, & ex eadem alii secta Regi finitimo sane, verumtamen ita libero, ut neminem in terris, uno excepto Christi Vicario, superiorem agnoscat, neque rogati ipsi, neque consulti præcepta vivendi, vel gubernandi, verbo scriptove transmittant. Se quidem nulli unquam dominantium intercessisse, quo minus in sua quisque ditione, quod potissimum expedire judicaret, id suo arbitratu consilioque perageret. Ad summam, nationes divina providentia suæ fidei commissas, maximæ sibi semper curæ fuisse, & nihil imposterum fore salute & commodis illarum antiquius. In hisce Ecclesiæ Gallicanæ difficultatibus quid optimum factu sit, semet nullo cujusquam hortatu monituve secum esse deliberaturum. Cum ejusmodi responso dimissi Legati nequaquam lætis animis, ad novas in Catholicum nomen accendendas irarum faces in patriam revertere. At Henricus ne conflandæ tali tempore contra se invidiæ Guisiani novam præberet ansam; ad formulæ Christianæ instituta de integro conformare sese, officia religionis intendere, squallido, & cinerei coloris habitu votivas peregrinationes obire, cum asperioris vitæ professoribus frequens agere, diurnis, nocturnisque choris, & sacrificiis interesse, quotidiana delicta per confessionem eluere, cælesti pane sese subinde recreare, summis atque infimis ad omnem pietatem, ac numinis reverentiam prælucere; cum tamen e dicaci populo interea non deessent, qui Regem hæc omnia simulare, in hortorum latebris, atque etiam intra ipsos cœnobiorum cancellos multa nefariæ libidinis, prodigi luxus, sacrilegæ

mentis

mentis edere exempla, non occultis modo sermonibus, verum etiam pro concione palam atque adeo vulgatis e typographia libellis, vero an falso, contenderent. At nihilo fecius Henricus rumores ejusmodi firma fronte contemnens, dum eximia cujusdam virtutis, & continentiae laudem captare pergit; inter Guisianos eodem tempore variis artibus jurgia, discordiasque clam ferere; copias eorum opesque imminuere; sevocatos ex iis primarios quosque docere, quam temere credidissent, Janvillanam conjurationem, conscio Rege, sed propter Navarræi metum dissimulante, conflatam. nihil sibi tam grave, tam novum in vita accidisse; plena fallaciar, ac vanitatis hæc esse commenta: proinde, si fas legesque, si debitam Principi fidem, si Deum denique testem, ac Judicem actorum uniuscujusque respicerent; relicto peregrinorum infidioso consortio, quos nulla charitas Gallicæ terræ teneret, ad expertam toties clementiam, benignitatem, amicitiamque sese reciperent. Hac ferme ratione Valesius magnam illustrium equitum partem, sese a Guisio deceptos, delusosque frementium, (& est ingenitus Gallicæ nobilitati mirus quidam in Regem suum amor & observantia) ab æmula factione carptim ad se traduxit; multo plures utique tempore procedente tracturus, nisi & fœderatis, partim Catholici Regis iterata subsidia, partim a Guisio Duce, (quam in tempore memorabimus) clarissima de æterno hoste relata victoria novum in aliquot annos firmamentum ac decus, & Christianissimo Regi male consulta pleraque, & super hæc fraudi conjuncta sævitia, ingentem apud omnes nationes invidiæ molem exaggerassent. Exitu anni Stephanus Barthorius magno rei Christianæ damno decessit Poloniæ Rex, belli æque ac pacis artibus inter paucos utique memorandus. quippe adolescens liberalibus disciplinis magna cum laude operam dederat. partam accurata lætione prudentiam, varia peregrinatione, duris eventibus, plurimo rerum usu firmarat. In re militari incertum fortior, an felicior, Gasparem Bechesium, cui prælatus popularium studiis in Imperio Transilvaniæ fuerat, Cæsaris ope novas res molientem semel atque iterum fuderat. Proximo dein ab Henrici discessu interregno Poloniæ, divisis procerum voluntatibus, a minori parte ad sceptrum evocatus, competitorem Maximilianum Cæsarem, conflato repente exercitu, acceptaque in matrimonium Anna Jagellona Sigismundi filia, consilio & celeritate antevertit: ejusdemque postea Maximiliani minas fremitumque animo excelso, atque ad omnem dimicationem parato contempsit. Inauguratus Cæsari deditos, & in partibus obstinatos Gedanenses ad Balticum mare omni clade perdomuit; Moschum ab Ecclesiæ Romanæ auctoritate sejunctum, aliquot præliis, & insigni Urbium expugnatione vehementer attritum, ad pacem demisse petendam, cedendum universa Livonia, & Ducatu Polotienfi, agroque Valisienti amplissimo, intra paucos annos adegit. Castæ Religionis haud minus, quam Imperii propagandi studiosus, colendis ingeniis in Ecclesiasticæ militiæ supplementa, Collegia Clericorum & Christianæ potissimum eloquen-

quentiæ scholas, egregia liberalitate constituit. Sacras ædes, vel vetustate labentes refecit, vel novas ædificavit; easque varia supellectili, & regalis opulentiæ donis instruxit. Præstantibus in bona qualibet arte viris favit enixe; nobilitatem opibus, atque clientelis ferociter exultantem sapientia legibusque compescuit.

Pontifici Romano ad exitum usque vitæ morigerum in primis, & obsequentem optimo exemplo se præbuit. Obiit, præmaturo publicis privatisque necessitatibus sine, quinquagenarius, in Turcicum bellum (modo fidelia Christianorum Principum auxilia non deessent) atque in ipsam Othomanicæ Tyrannidis arcem spe & cogitatione jamdudum imminens. Ejus morte, præsertim quod sine prole decesserat, Polonica res, vetere instituto gentis, ad armata comitia rediit. Eo Sixtus Annibalem Archiepiscopum Neapolitanum, nondum audita morte Regis, Nuncium Apostolicum ab Urbe profectum, quam maximis itineribus maturare jussit, ac providere omni consilio, ne quid ob Comitiales tumultus Christiana Religio caperet detrimenti.

Libri Primi Finis.

JOANNIS PETRI MAFFEJ

E SOCIETATE JESU

HISTORIARUM AB EXCESSU

GREGORII XIII.

PONT. MAX.

LIBER SECUNDUS.

INter hæc Germani Oratores, quos ab Henrico Valesio irritos abiisse memoravimus, irarum pleni suos quisque populares, ac Regulos ad eam ulciscendam contumeliam, & socios Calvinianos ab Regis Galliarum vexatione vindicandos, omni arte concitaverant.

Neque hujusmodi animorum inclinationi pro sua parte defuit Navarræus. Præter quotidianas Epistolas, nuntiosque insuper e primariis Duces in Germaniam ad evocanda auxilia destinavit. ii non tam præsentī pecunia, quam ingentibus promissis peditum variæ armaturæ ad viginti, equitum ad decem millia, magno cum numero tormentorum brevi contraxere. quibus additus Gallicus equitatus Hugonoticus, Roberto Bullionio universi exercitus Præfecto, Catholici nominis Gallos terrore, perduelles eo maiore impleverat spe, quod per eos ipsos dies Annas Joyeuse insignis Catholicorum Dux, ad Cutracum ab Navarræis ingenti prælio victus, una cum ipso nobilitatis flore ceciderat. Et Franciscus Digueria celebris Hugonotarum auctor, in Allobrogibus vicinoque tractu, Baleone adjutore, non contemnendos habuerat progressus. Igitur appetente Autumno Bullionius infausto movens agmine per Alsatiā, Lotharingiæ fines ingressus, cuncta ferro, ignique pervastat. eo sævitæ Hugonotarum rabie, quod Lotharingii dynastæ sese præ-

præcipuos Catholicæ causæ patronos ac propugnatores ferebant. Inter Gallos dein, & Germanos de ratione itineris orta controversia : cum illi quam brevissima via Ligerim petendum, eoque trajecto, jungendas cum Navarra copias; hi longiore ambitu, sed tutiore, ac minus impedito, in Ambianos contendendum esse affirmarent. Aliquantu diu disceptatio tenuit : denique brevitati consultum. ejus dissensionis mora perniciem hæreticis attulit; siquidem interea Catholicis quicquid supererat in agris elementorum, in loca munita rapiendi, spatium est datum : & Rex valido exercitu atque omni genere tormentorum, qua Ligeris interdum aperit vada, ita ripam insedit, uti neque a fronte Germanis aditum sine certo ipsorum exitio patefaceret; haud ægre laturus, ut ferunt, si retro in Lotharingios tota belli moles incumberet. Aliis insuper locis pontes omnes non levi præsidio firmarat. ac per idipsum anni tempus imbres continui inflatis amnibus ita corruperant vias, ut impedimenta, machinæque profundo, ac tenacili limo ægerrime traherentur. Præterea Guisus, & Mayneus longe inferiores militum numero, licet universi certaminis aleam consulto vitarent; tamen & bonitate causæ, & equitum peditumque virtute confisi, præcedentium agmen subinde carpere, fatigare, pabulatione rapinisque, ac trajectu fluviorum arcere. Ad hæc difficultates brevi accessit pecuniæ inopia. Quo circa Helvetii stipendia seditiosis vocibus cum aliquandiu postulassent, blando Gallorum Ducum sermone, & cohortatione frustra compressi; denique misso ad Regem Oratore, veniam illati belli suppliciter petierunt: excusantes imprudentiam quod Borbonionorum artibus atque fallaciis, per speciem novæ in Regem conjurationis opprimendæ, contra ipsum Regem tulissent arma. orare sese uti per Galliæ fines reditus fidem daret; se innoxio agmine quamprimum abituros. Ad ea Rex, qui se tam gravi hoste qualibet ratione levatum cuperet; molli brachio reprehensa levitate eorum atque perfidia, quod inexploratis rebus, rupto vetustissimo fœdere, ad se oppugnandum venire in animum induxissent; datis qui prosequerentur, benigne dimisit. Neque tamen iccirco audaciæ pœnas effugere potuerunt. quippe solutis ordinibus, passim ab agrestibus cæsi, aut spoliati, exiguo numero inermes, ac seminudi, in patriam revertere. At nec Germanorum quidem lætior fuit exitus. Multis acceptis in itinere detrimentis, cum præcipua eorum pars in oppido cui Arenæo nomen, ipso Beati Martini pervigilio, vel paullo post, ut tradunt alii, confederissent; pactis cum arcis præfecto induciis, undique se tutos rati, Martinalia, ut appellant ipsi, per lasciviam celebrare, ciboque ac mero semet ingurgitare cœperunt. Sed incolarum indicio, quos illi teædis exegerant, a Guisianis peditibus mille quingentis, Francisco Aurelianensi præfecto per ipsam arcem introductis, oppressi sub lucem, interque somnum, & epulas, ac perpotationes fœde trucidati, supra mille

mille & quadringentos : alii , qui se intra ædes raptim communire tentaverant , subditis ignibus concremati fere sexcenti ; equi militares capti amplius duo millia . præda omnis recepta . e Guisianis unus tantum amissus ; nonnulli faucii . Guisus ipse tota nocte pervigil cum equitatu circumierat muros , ad prohibenda & ex oppido effugia , & e vicino subsidia . Dæus tamen Baro mediam hostium aciem regere solitus , inter tumultum mœnia supergressus , per intermissa custodiis loca , cum paucis effugit . Abeuntem cetera multitudo variis agri ejusdem dispersa vicis trepido agmine subsequuta . Ea demum gentis impiæ clades , & Gallum diuturna formidine liberavit , & labantes Janvillanæ societatis opes , & existimationem in aliquod tempus egregie fulsit . Lotharingii exuviis hostium induti , Lutetiam maximo omnium gaudio , faustisque acclamationibus ovantes ingressi ; haud dubie cunctis ordinibus Guisium patriæ servatorem , publicæ salutis parentem , summam Imperatorem ad astra ferentibus . Quæ res infestum jampridem in Lotharingios fratres animum Regis vehementer accendit . æmulorum opes augescere ; non æquari modo , sed etiam anteferri Guisium ; tantæ ac tam salutaris victoriæ palam eripi sibi decus impatienter indoluit . Paucis ante mensibus , quam hæc in Gallia gererentur , atrox in Anglia facinus editum est . Maria Scotiæ Regina popularium hæreticorum scelere exagitata , ad Elisabethæ Anglæ cognatæ misericordiam ac fidem , ipsius invitatu ante annos ferme viginti confugerat . ibi mutato in carcerem hospitio indignum in modum habita ; ad extremum a Calvinianis , qui & Religionis causâ pessime illam oderant ; & quod Angliæ sceptrum defuncta Elisabetha ad eam jure pertineret , suæ perfidiæ vindicem extimescebant ; structis rerum novarum criminibus , ad sexagintavirale consilium defertur . Id consilium Calvinianis omne constabat ; confictis Mariæ ad conjuratos quosdam literis , falsisque testibus confirmata calumnia , infontem capitis damnant . Elisabetha sententiam approbavit ; ac nequicquam absterre immanem feminam a tam nefario scelere conante Belliaureo Galli Regis Oratore , lege in eam paucos post dies agi jussit . Maria sese & auctæ Religionis plane retinentem , & in Elisabetham nihil unquam secus molitam esse , jurejurando testata , inter domesticorum lacrimas percussori cervices fortiter admodum præbuit ; Jacobo filio adolescente relicto , quem prima ætate Calviniani a complexu parentis avulsum Bucanano magistro fraudibus atque imposturis , a recta in Deum fide , atque a Sacrosancta Romani Pontificis auctoritate diffuaserant . Ex eodem Angliæ Regno pyratæ complures Peruanæ gazæ illecti dulcedine , conjunctis Regiæ hortatu viribus , Occidua maria repetierant . vastataque iterum Dominicana insula , atque inde in meridiem superato Divi Augustini promontorio , ad Magellanicum fretum prædabundi cursum intenderant . In reditu circa Trinacrium promontorium sagittas (id navigii nomen a

præacuta prioræ figura) mercibus onustas , trucidatis vectoribus , nau-
tisque suppresserant. Ea re per speculatores cognita, Alvarus Bazanius
maritimæ rei a Philippo Rege præpositus, pyratas opportuno loco ex-
pectare, cumque iis prælio decertare constituit, multo superior & nu-
mero, & genere navium; quippe Anglo non plus quinque & quadra-
ginta erant naves, instructissimæ illæ quidem, sed quæ velis dumtaxat
agerentur. Alvarus ad amplius sexaginta onerarias, ornatissimas septem
& triginta triremes adjunxerat. Ubi in conspectu prædones fuerunt,
confestim pugnæ signum ingenti animorum ardore utrimque proposi-
tum. Alvarus per se, perque venerandum Ximenium eximia pietatē
concionatorem suos hortatus ad eluendam prioris anni maculam, atque
ad hostes Catholici nominis, templorum eversores, sacræ juxta ac pro-
phanæ rei raptores merito supplicio puniendos, classē in hunc maxi-
me modum instruxit. In fronte, modico ab ceteris intervallo, majores
octo naves, incertum quo rectore constituit; dextrum cornu cum sep-
tem pariter onerariis, celocibus novem, sagittis sex, Garziæ Manrico;
sinistrum cum onerariis totidem, celocibus quatuordecim, Lupo Contre-
riæ attribuit: mediam aciem navium duarum ingentium, triremium
quinque & viginti sibi desumfit; in subsidiis Roterium Quesadam
cum duodecim triremibus, sagittis totidem collocavit. Hoc ordine ex-
piatis ante per Sacram Confessionem cunctorum animis, uti ad missi-
lia ventum est; prior ab Hispano ferrea procella undecim primi ho-
stium agminis naves male multavit, ac duæ præsertim adeo perforatæ,
uti propemodum mergerentur. Hasce dum obturare, ac sarcire cona-
tur hostis, ab latere Contreria, utramque suppressit. injectis deinde in
proximos ordines harpagonibus, conferta comminus pugna, militum
multitudine ac virtute præstans ab ea parte Hispanus, tamquam in
terrestri certamine magnam edidit cædem. onerarias alias demersit,
alias cepit. Dissimilis in lævo cornu successus; lacera navium arma-
menta, periculosi milites; & Manricus prope jam cedere cogeatur;
nisi e postrema acie Quesada cum triremibus advolasset. Ejus accessu
prælium illico restitutum: & Alvarus e medio in omnes partes inten-
tus, qua maxime laborari senserat, eo statim subsidia submittebat; ac
multis gestis rebus jam ante clarus, nullum ne eo quidem die egregii
Imperatoris officium prætermisit. Duas ferme horas tenuit pugna. to-
ta deinde jam vincere classe Catholicus; cædi, capique, aut in fugam
verti prædones: naves eorum viginti magno cum numero omnis gene-
ris hominum in potestatem venere; in iis Prætoria, in qua saucius
vehebatur Archipyrata ipse Francisci Draci fratre genitus Eduardus.
Incensæ præterea sex; elapsæ duodeviginti; intersectorum numerus re-
latus ex Anglis novem fere millia. Ex Hispanis mille trecenti; navium
Hispaniarum sagittæ fere omnes, triremium una tantum, salvis homi-
nibus, obruta; ex onerariis afflictis, ac semilaceris, nulla tamen inte-
riit.

ruit. Alvarus tam insigni parta victoria, retro ad Helenæ promontorium novem reduxit. ibi solemni ritu gratiæ, laudesque ad Deo. refecta dein classe, directisque in Lusitaniam prorsis, ingenti omnium gratulatione triumphantis in modum Olyssiponis portum invehit. In ea tum Urbe Philippus excidium Anglicanæ tyrannidis jamdiu coquens, classem adornabat, quantam Oceano innasse nemo plane meminerat. Variæ formæ naves aut labefactæ refici, aut novæ ædificari, ex omni maritima Hispaniæ ora; negotiatorum onerariæ comprehendi; veterani e præsiidiis deduci milites, recentisque conscribi; congeri, & condi cibaria; tormenta fundi; linteorum, sparti, armorum æris, ac ferramentorum officinis, & omni bellico apparatu cuncta perstrepere. Quod, ubi Sixto compertum, ne pro virili parte cuiquam ardore liberandæ ab hæreticis Angliæ cedere videretur; auri decies in eam expeditionem attribuit, conditionibus iis, quæ ad restituendum in eo Regno splendorem Catholicæ Religionis, & renovanda jura Sedis Apostolicæ pertinerent. quam tamen ille donationem ita ratam esse voluit, si ante exitum Novembris insequentis anni litoribus Angliæ classis appulsa exercitum exposuisset. Quo exposito quingenta aureorum millia statim Hispano repræsentari, & altero quoque mense justis pensionibus reliquum bona fide numerari iussit. Sin toto eo tempore descensio facta non esset; prorsus irrita censeretur, inanisque largitio. Iisdem fere diebus in limite Pannonico Turcæ ultionis avidi, quod per hiemem Hungari glaciato lacu Balacone Copanum Castellum eidem lacui impositum improviso impetu ceperant; multisque occisis, aut captis, non contemnendam ex eo loco virorum, & mulierum ingenuarum ac nobilium, insuper equorum prædam abegerunt; contractis Augusti mense peditum, equitumque millibus circiter quinque, Nessim agrum Cæsareæ ditionis ingressi, omnem circa regionem effusa populatione vastarunt; ignobiles aliquot vici, villæque exustæ, præda ingens hominum, pecudumque, & rerum agrestium acta. Hisce rebus auditis Cæsariani, educto quam celerrime a præsiidiis milite, noctu fauces ad Canissam infedere; qua paludes coarctant iter hostibus in reditu necessarium. hosce grave impedimentis inexplorato trahentes agmen, cum nec angustia, nec multitudo receptum daret, expediti ipsi magno animo adorti, ad duo millia trucidarunt. quidam in stagna coniecti, & cum ipsis equis hausti gurgitibus; alii capitibus tantum extantes supplicibus ad hostem manibus, vocibusque, commota miseratione vitam emercati servitio; pauci fuga in silvas elapsi ab rusticis indagine cincti, cæsi que. præda omnis, & captivi recepti, & super mille trecentos homines, mille etiam, & quingenti equi Turcicæ pernicitatis abducti. victoriæ signum captivi sexcenti; quadringenta hostium capita Canissam extemplo transmissa. tantoque malo in menses aliquot contusa Turcarum audacia. In Germania inferiore hoc anno ferme quies

ab armis fuit. Franciscus Colonienſem rem adverſus Turcheſianos novis auxiliis tutari non deſiit ; Varorique Caſtellum paſſione recepit , Gallico præſidio ſexdecim aureorum millibus perſolutis . Neque tamen vitare potuit, quo minus ex altera parte Bonnam , Urbem Herneſti Archiepiſcopi ditionis, Martinus Schenchiuſ furto ſurriperet ; ad eamque retinendam munitiones in adverſa ripa fluminis excitaret . Intenſiores tum animos omnium Regum , ac nationum comitia habebant Polonica ; quæ in plures primo faſtiones diviſa, ad duas poſtremo redierant : harum altera Maximilianum fovebat Rodulphi Cæſaris fratrem, præter Imperii Sacri ditionem , pleraſque etiam contiguas Poloniæ gentes hereditario dudum jure obtinentis ; altera pro Sigifmundo Joannis Svetiæ Regis filio nitebatur . Ab Auſtriaco Gregorius Radziviſſius Cardinalis, fratresque Dynaſtæ ; item Epifcopi , & Senatores aliquot, ac Palatini, ſtabant ; necnon e clara ſtirpe Sborofcii ; & ſi qui præterea ab Stephano Rege ſe male habitos querebantur . Sveco Anna Jagellonia , Stephano viduata, Sigifmundi matertera , conſilio , viribus , opibuſque præpollens . huic inter primores præcipue addiſtus obſequio vetuſto, & acceptis a Stephano beneficiis, Joannes Zamofcius Regni Cancellarius, & Equitum magiſter, cum rem ad bellum haud dubie ſpectare, & juſ in armis fore proſpiceret ; coaſto mature exercitu, magnis itineribus Cracoviam contenderat Regni caput ; eoque per literas, nuntioſque Sigifmundum evocare non deſiſtebat . Maximilianus contra Varſaviæ per acclamationem Rex a ſuffragatoribus paulo ante renunciatus ; idemque ſat memor quantum in ſimili re Maximiliano tarditas obſuiſſet ; Olmutium Moraviæ Urbem , Poloniæ finitimam, ſine mora contendit . ibi a ſuæ partis Oratoribus oblatas regnandi conditiones in templo maximo rite firmavit ; dein e proximis locis haud ita magno numero peditum, equitumque collecto , Cracoviam ad Sacramentum a reliquis exigendum feſtine progreditur . Verum contra opinionem exclusus , caſtra ſub mœnia poſuit , vaſtitaſtem agris, Urbi excidium minitans . Cives ea denuntiatione perterriti, Zamofcio auctore, ſimulata benevolentia, variis pollicitationibus ambagibuſque tamdiu tempus extraxere, dum Zamofcio ad copias augendas , Urbemque porro muniendam ſpatium foret . Inter quæ Maximilianus, cum unam tamen e portis nocturna proditione cepiſſet ; concurſu repente populi ad arma faſto introductos e ſuis admodum quingentos amiſit . Ea clade, & quod exaſto jam Autumno ſupervenientis hiemis incommoda, ſævitiamque ſub pellibus extimeſceret ; & a majoribus tormentis e ſuperiore loco non leve damnum acciperet ; omiſſa in præſens obſidione, Crepitium primo, dein Viſlunium ejuſdem regionis loca, ſeſe recepit ; majore apparatu, cum primum ver ſe aperiret, ad perdomandam Polonorum contumaciam rediturus . Sigifmundus interim tranſmiſſo Baltico mari ad Gedanum excenderat ; Petricoviam inde

modica armatorum manu progressus, ab immisso repente Maximiliani equitatu propemodum opprimitur. Saluti fuit turbæ agrestis indicium. Ipse, quique cum eo erant, relictis impedimentis, qua cuique proximum, aufugere. collecti deinde, & viribus aucti, cum novi quoti-die ad Sigismundum concursus fierent; Cracoviam incolumes pervene-re. ibi partim interregni tædio, partim civilis belli metu, Moscho præ-fertim ac Turca imminentibus, partim etiam frequenti Annæ largitio-ne, & super hæc acerrimo Zamoscii ministerio, necnon Svetiæ ad Po-loniæ sæptrum adjungendæ spe inclinantis in Jagellonicam stirpem, omnium ferme ordinum studiis, maxima Senatus populique frequentia & celebritate, Sigismundus Rex consalutatus, more majorum in folio collocatur sexto Kalendas Januarias. quo ipso die ab reliquiis Austria-cæ factionis Lubloa insigne Castrum cum aliquot minoribus Castellis, ac vicis in Poloniæ finibus e regione Hungariæ occupatum, imposi-tumque præsidium. Quæ res ne in exitiale bellum erumperet; Tur-camque in omnes ejusmodi occasiones intentum, alienissimo Christianæ Reipublicæ tempore irritaret; Anibal Nuntius Apostolicus, quod ita cordi esset Pontifici maximo non ignorabat, Crepitum accepta fide profectus, dum de pacis conditionibus ageretur, inducias in mensem unum a Maximiliano impetravit. Neque Poloni sese a factionibus alienos ostendere; in novos interim apparatus armorum intenti: ne-que ita ægrè ferentes, mentione pacis injecta, Germanorum impetus re-languescere. Dum super ea re sententiæ dicuntur; & interpretes com-meant; & Maximilianus e Poloniæ finibus in Silesiam transgressus, in oppido Pitschinio (Buziatam appellant alii) sese continet; repen-te affertur, infestis signis magno cum exercitu adesse Zamoscium. Ma-ximilianus inopinato nuncio percussus, tamen collegit animum; ne-que tam fiducia militum, quos paucos, & in iis recentes quosdam au-xiliares ex itinere fessos habebat; quam pudore ne certamen defugere, & muris tenere sese videretur, appropinquanti Zamoscio armatus oc-currit. commissaque pugna vim hostium fortiter aliquandiu sustinuit. Superante dein multitudine, & promptissimis suorum interfectis, cum alia munitiora in vicino paterent oppida (quo consilio incertum) intra Pitschinium sese rursus includit. Ibi cum neque instaurando præ-lío vires, & obsidioni tolerandæ nihil ex ante convecto suppeteret; fe-rociter instanti Zamoscio, semet amicorum hortatu, permisit. a quo ne locus ei ad gentem ultra sollicitandam, novasque ciendas turbas ul-lo pacto daretur, penitus in intimam Ruffiam deportatus, & in Cra-stnostavii arce citra omnem contumeliam ille quidem, verumtamen acri custodia septus est. Ejusmodi eventis valde commotus Cæsar in Urbe Praga tum agens, nec fraternæ modo cladi, periculisque, sed etiam dedecori universi Austriaci sanguinis ingemiscens; Bohemiæ pro-ceres ad eam ulciscendam injuriam meditata oratione incitare conatus est.

est. Illi habito consilio respondere : a Maximiliano cinctam obsidione Cracoviam , proximas regiones incendio , rapinisque vastatas , capta Castella , dirutas villas ; contra a Polono pro fecis , arisque pugnatum ; optimo jure vim vi repulsam ; nullam sibi videri subesse justam causam Polonos bello publice prosequendi ; violandæque Societatis , quæ inter utramque gentem præter mutuos usus atque commercia , sanctis etiam legibus intercedat . Se quidem ad tuendum Silesiæ , si res ferat , limitem subsidia decreturos ; ad arma finitimis inferenda nequaquam . Hac spe destitutus Cæsar , secumque reputans , quam non suarum virium , si per se niteretur , expeditio hujusmodi esset futura ; dimisso in præsentia , quem conscripserat , milite , ad leniora consilia flexit , atque ad consultandum in communi causa propinquos accivit ; sollicitos dumtaxat , quonam pacto in tanta rerum , ac temporum iniquitate , æquis conditionibus , & ex Austriaci nominis majestate , pax convenire posset . In ea deliberatione fluctuanti , peropportunos , perque gratum (licet in Protestantium gratiam , & ostentandæ fiduciæ primo dissimularet) accidit Pontificis maximi studium , suam in id operam , & auctoritatem amicissime deferentis . Quod ubi sensit Pontifex , ac prætentata utriusque partis voluntate , neutram a concordiæ mentione abhorrere perspexit ; in eam ipsam pacificationum curas , & cogitationes acrius cœpit intendere . neque vero fallebat præstanti judicio virum quantæ molis ea foret disceptatio . Ergo perquam accurata disquisitione cogitanti , cui potissimum ejusmodi provinciam destinaret , idoneus inter alios occurrit (quem e Rotæ Auditoribus in Sacrum Collegium a se nuper adscitum , honore Pœnitentarii majoris inseper auxerat) Hippolytus Aldobrandinus , illustri , ac perantiqua florentinas inter familia , Silvestro Jurisconsulto clarissimo patre natus , summa ipse legum peritia , flagranti religione , plurimo rerum usu , & gravissimis in Christianæ Reipublicæ negotiis diu multumque spectatus ; & (quod in tali causa maximi erat momenti) minime inabuto partibus animo . Hunc perhonorifico instructum comitatu , nullis certis mandatis , tantum , quæ in re præsentis locus , ac tempus monerent , exequi jussu , ineunte vere in Poloniam ab suo latere magna cum Senatus approbatione legavit . Is ad propitiandam in primis Dei matrem aureis e sua tenuitate quingentis Ædi Lauretanæ dono transmissis , & quacumque iter habuit , relictis non obsuris & pietatis Christianæ , & egregiæ domesticæ disciplinæ vestigiis ; & Oeniponti primum a Ferdinando , Lyntzii mox a Matthia ; postremo Viennæ ab Herneſto Austriacis , per summam venerationem exceptus est . Inde relicta ad lævam Praga , nequid festinatus cum Cæsare congressus Polonis incommodæ suspitionis afferret ; Cracoviam recta contendit : atque ad secundum ab Urbe lapidem obvium habuit Sigismundum cum equitibus ex prima nobilitate quingentis (in quibus alati complures ,

aut

aut ferarum pellibus horridi, Scytharum terriculamenta) peditumque fistulatum, quos Aiduchos vocant, septem cohortibus, qui non uno loco repetitis ex arte bombis, effusæ cujusdam edidere signa lætitiæ. Eo comitatu, lævum semper regente Legati latus ipsomet Rege, portam intranti præsto fuit sacro cum Cleri totius agmine Episcopus Civitatis; a quo porrectam sibi de more Crucem pie osculatus, ad maximum templum, digresso jam Rege, perducitur. Ibi fufis ad Deum precibus, & reliquis cærimoniis e rituali peractis ad hospitium divergit; lauta omnia ab Rege splendide præbita, & nullum utrimque comitatis, aut humanitatis officium prætermisum. Primo dein Senatus die introductus in Curiam Legatus, ad Regis dexteram sub eadem umbella confedit: prolata Pontificis Maximi literæ cum illustri testificatione eximiæ cujusdam in Polonos omnes benevolentiae, quas Legatus ipse apto ad rem sermone est subsequutus. Gratiæ ab Senatoribus reverenter actæ, ac nihil eo die de controversia communi relatum est. Post hæc Legatus ad liberandum protinus e custodia Maximilianum toto pectore incubuit; quod & Pontificem valde cupere, & Cæsarem ardentem optare non ignorabat. Ergo ad privatum Regis colloquium admissus, modica interposita quiete, in hunc fere modum exorsus est. “ Et pastoralis vigilantia, qua pro universo Christi excubat Grege Sanctissimus Dominus noster, & præcipuus amor, quo nobilissimum hoc Regnum amplectitur, & circumspicit etiam, atque etiam singula Reipublicæ membra, Serenissime Sigismunde, in eam sententiam optimum, ac sapientissimum Virum adducunt, uti Maximilianum Archiducem bello captum a tuis, liberum abs te dimitti, non tibi minus, quam ipsi Maximiliano censeat expedire. Sed tantum hoc beneficium, quo majorem tibi, & gratiam, & gloriam pariat; cum sine mora tribuendum est, ne diu noluisse; tum sine ulla deductione, vel pretio, ne datum in fenore potius, quam in munere posuisse, videre. Equidem tam præclaras de quolibet homine benemerendi occasiones, vita ipsa mercandas existimo. Quanto dignior, quem omni benignitate, atque officio prosequare, Maximilianus hic, tam insignibus corporis, animique ornamentis, tot nobilium clientelis, tot Cæsarum imaginibus, tot Procerum, Ducum, Regum, ac præsertim Philippi Catholici tam arcta cognitione præfulgens. Te Deus immortalis jam ante Svetiæ Imperio destinatum florentissimo insuper hoc Regno Poloniæ, vel fractis, vel repente conversis ad te adversariorum opibus, auxit. Quod illustrius edere potes grati erga superos animi documentum, quam Christi causa incolumitatem ac salutem illi ipsi liberaliter dando, qui tecum armis de sceptro ac de maiestate certavit? Quid porro ad nominis tui famam, atque ad omnis posteritatis memoriam gloriosius, quam rerum humanarum vicissitudinis memorem, & secundis rebus moderante ac sapienter utentem, atque imperantem tibi met, ipsam quodammodo

modo vicisse victoriam. Speciose forsitan hæc jactari, dixerit quispiam, „
 antiquorum hominum esse præcepta; longe nunc aliis moribus, atque „
 institutis agere sæculum; honesti formam ac pulchritudinem negligi; „
 cuncta ad imperandi rationem, atque ad utilitatem referri. quin etiam „
 ex ipsa Austriaca gente Caroli Quinti exemplum obijciat, qui supera- „
 tum acie, comprehensumque Franciscum Galliarum Regem eo nomine pri- „
 mum, re diu multumque agitata, non ante solverit, quam ab eodem „
 super ingentem pecuniæ vim, alia quoque non levis compendii com- „
 promissa obsidibus acceptis exprimeret. Hisce igitur, aliisque ejusmodi „
 rationibus, & eventis consiliarius aliquis fortasse non infidus, certe im- „
 posterum non valde prospiciens, ea quæ dicere institui, refellere, aut „
 elevare conetur. Quid si Pontificis Maximi plena decoris, & sanctita- „
 tis, & clementiæ monita, eadem ad constabiliendam tibi dominationem, „
 & mutantis adhuc Regni firmandum exordium, non modo tutis- „
 sima, sed etiam in primis necessaria esse demonstro? Ac primum illud „
 sine dubitatione ponendum est; ad componendam ab interregni pertur- „
 batione Poloniam, domestica vulnera persananda, conciliandas omnium „
 voluntates, opus esse ab hoste quietem, ab cive concordiam. Atqui „
 neutrum, nisi manumisso comiter Maximiliano, obtineri diutius pote- „
 rit. Nam hic quidem rerum status ad vindicandum omni conatu aut „
 Germanum fratrem, aut valde propinquum, vel ipso tacente, Austria- „
 cos universos, ac præcipue Regem Hispaniarum dies noctesque solici- „
 tat. At quem Regem? Totius Christiani Orbis validissimum; omnes „
 ab omni memoria Reges Imperii latitudine superantem; tot maritimas, „
 ac terrestres alentem copias; tot exercitatos in bello duces, ac mili- „
 tes; tanta non solum ex fertilissimis Europæ Regionibus, verum etiam „
 ex Orbe novo, Indiaque, & ipsis demum Antipodibus vestigalia ca- „
 pientem. qui si ad necessariam cognati ultionem cum Cæsare, ceteris- „
 que gentilibus arma consociet; quæ species Polono esse potest tantæ „
 conspirationi, tantisque viribus humana spe, consiliove absistendi? Quid „
 si ex alia parte eodem tempore ingruat Moschus Polonico nomini sem- „
 per infensus? Quid porro si intra Poloniam ipsam, vel qui Austriaco „
 adhuc tacite favent, vel qui odio præsentium, ut sit, cupidine muta- „
 tionis tenentur, sese ad externos adjungant? vel denique Turca ipse „
 inter nostrorum certamina, quum maxime imbecillem esse Christianam „
 rem senserit, repente se infundat, cuncta deformet incendiis, omnis „
 ætatis ac sexus mortales in servitutem adducat? Hæc tibi, tuisque, „
 Rex, etiam atque etiam reputanda sunt, neque tam lucri, vel com- „
 modi præsentis illecebra, quam futuræ calamitatis non dubia expecta- „
 tio in consilium adhibenda. Nam quod ad Caroli Quinti præjudicium „
 attinet; id vero ejusmodi est, ut sanæ quemlibet mentis, non tam „
 initia facti ejus ad imitandum, quam exitus ad evitandum impellere „
 debeant. Qui si piorum, ac prudentium obtemperando monitis tradi- „
 tum

tum sibi divinitus clarissimum Regem extemplo patriæ incolumem reddidisset ; præter æternum conscientiae fructum , & consonantes humani generis acclamationes ac plausus , ipsum quoque Franciscum , qua erat altitudine animi , in perpetuum sibi devinctum , atque ad omnia paratissimum inæstimabili rei Christianæ bono scilicet habuisset . Hunc dum fallaci specie mercedis illectus , inclytum Regem custodibus cinctum ægritudine primum animi contabescere patitur ; dein ad immane pretium redemptionis , aliasque duras condiciones adactum , acceptis insuper obsidibus atque pignoribus , vix tandem Gallicæ nationi restituit ; usque adeo exacerbavit , uti iusto cum Turcis fœdere , non ipsum modo Cæsarem acerbe deinde vexaverit ; sed etiam universam Christi Ecclesiam , iis cladibus ac damnis affecerit , quæ pro magnitudine sat expendi , & sine lacrimis commemorari non possunt . Melius & consultius multo Philippus Insubrium Dux , qui afflictum infelici pugna deditumque sibi Alphonsum Neapolitanum Regem , tanto & in honore habuit , & cum benignitate dimisit ; uti non solum ex eo tempore cunctas illius opes promptissimas in omne discrimen habuerit ; sed etiam ab eodem Regni heres in spem secundam fuerit institutus . Hujus tu præstantissimi Ducis exemplo si Maximilianum Austriaci nominis amplitudini , ac dignitati donaveris ; primum Deo pacis , & consensionis Auctori haud dubie gratissimum feceris ; dein præpotentes Reges , populosque arctissimo amoris vinculo tibi in sempiternum obstrinxeris : tantumque aberit , ut armis te unquam laceffant ; ut pro tua majestate , ac Polonicæ nationis incolumitate , ac salute quotiescumque res ferret , omne periculum atque dimicationem subire non dubitent . Id ipsum de Maximiliani virtute ac probitate sperandum est . Quod si repulsæ , quam beneficii memor (quod absit) in alienatione voluntatis , & in lædendi nihilominus cupiditate perstiterit ; lingua fremat , licebit , re quidem ipsa manuque (quando vanæ sine viribus iræ) omni destitutus auxilio , tibi tuisque nocere profecto non poterit . Hæc ipsa , quæ pro demandata mihi provincia , hodie tibi a me fidelissime exposita sunt , Sixtum ipsum Christi Vicarium in terris coram tecum agere velim putes : qui amantissimi ac prudentissimi parentis instar , iurgantes rixantesque filios æque sibi charos omni studet ratione compefcere ; ne duorum pernicies universam domum atque familiam trahat . Quod vero ad me ipsum proprie pertinet , præclare intelligo , quantum oneris in huiusmodi legatione sustineam : ac proinde quantum cura , labore , consilio , ac denique votis assequi potero , enitar , atque contendam ; uti meas in hoc tam pio , tamque salutari negotio partes , neque is , a quo sum legatus , neque tu , dilecte Deo Sigismunde , neque mortalium omnino quispiam jure desideret . Ad hæc audita suspensio atque confuso animo Sigismundus probe se percepisse ait , quæ ab Legato in medium allata sint ; sed eam esse conditionem Polonicæ ad-

E

mi-

ministrationis, ut nihil majoris momenti Regi liceat, inconsulto Senatu, decernere. Ergo rejecta ad consilium re, dictisque sententiis responsum a partibus est. Quæ Legatus cum Sigismundo Sixti nomine privatim egerit, digna esse communi Generis Humani Parente, digna Sanctissimo Christi Vicario. Verumtamen de gratuita Maximiliani missione, integrum non esse. primum quod Magistri equitum ratio sit habenda, qui captum jure belli detineat; deinde quod inter ipsam deditionem Austriacus nonnulla sponderit, quæ negligi salva tum ipsius religione, tum Polonici nominis vel re, vel dignitate, non possint. Ad pacem & quietem Polonos multis de causis propendere; & si aditus ad compositionem detur, eas condiciones communi consensu dicturos, quas iniquitatis nemo non iniquus possit arguere. Ceterum ad hæc promendas non ante descensuros, quam exploratam sit arma ne Cæsar, an concordiam spectet: adhuc certis, Regi ac Senatui indictum ab Cæsare Pragæ conventum, tarditatemque hominis, ac taciturnitatem merito esse suspectam. Hisce auditis Legatus, non quidem ille de tota re, verum de Maximiliano in præsentia liberando spem pene abiecit; tentatisque per epistolas, ac per idoneos e sua cohorte viros procerum animis, qui procul a Cracovia diversis tum agebant locis, Cancellarii vero præsertim; postquam fere cunctos, ni aliunde vis afferretur, ad mansuetudinem atque ad otium pronos animadvertit; non jam per internuntios literæ suæ, sed ipsemet Cæsarem adire, soluto jam conventu, atque in mitiore sententia confirmare constituit. Magnificum ac lætum Cæsari id: neque pietate atque observantia in Sedem Apostolicam ab Sigismundo vinci se passus, adventanti Pragæ Legato, ad tria ferme passuum millia extra Urbem, splendido ac numeroso cum equitatu gratulabundus occurrit. Uti propius ventum est; ad pedes ambo digressi, junctis aliquandiu dextris, plena amoris & charitatis miscuere colloquia. conscendere dehinc, & pari pompa pariter deducto ad Archiepiscopale usque hospitium Legato, ipse in arcem e regione positam se recepit. Clerus non uti Cracoviæ ad portam Urbis adfuit; ne semetipsa Catholicorum paucitas proderet; Paræciis ac Sacerdotiis fere omnibus Hussitarum, aliorumque hæreticorum scelere dudum occupatis. tantum in Æde maxima cum Archiepiscopo pullillus grex intranti Legato se per gaudium & adorationem ostendit. Ceterum quacumque cum Cæsare Legatus incesserat, tanta fuit omnis generis, & conditionis hominum concursatio studio visendi quam augustissimo ornatu unum ex Ecclesiæ Romanæ Principibus; uti undecumque conspectus esset, atque etiam extra conspectum, campi, plateæ, recta, spectatoribus opplerentur; hæreticis ipsis majestatem ac speciem Apostolici Legati sine fine mirantibus, collacrimantibus ac propemodum liquefcentibus gaudio, qui recta permanferant fide, quod imaginem quamdam reviviscentis in eo tractu Religionis avitæ, sibi

cernere viderentur. Dierum aliquot moram necessario duxit eadem in Urbe Legatus. Quo tempore domum, & ipse ad Cæsarem, & Cæsar ad eum salutandi caussa venire. Simul etiam populum prompto aditu, benignis alloquiis, obvia comitate, aulicos, qui sibi Cæsaris jussu apparebant, copiosa pariter ac scita largitione; Cæsarem ipsum, ac Principes modestia, labore, consilio, sed ante omnia fide, ac sinceritate demeruit. eundemque Cæsarem facile adduxit, ut ad controversias cum Polono dirimendas, ad fines utriusque Regni decem viros destinaret. quod ipsum Poloni pro sua parte, Cancellario præsertim Austrore, jam ante detulerant. Eodem Legatus, ne quid ipsa dies afferret impedimenti, sine cunctatione se transtulit. Assignati Conciliis vicini duo modico intervallo distantes; Bizinum in Polonia, Bitumium in Bohemiæ limite. Congregatis dein Procuratoribus, & in iis ipso met Zamoscio, & factis in rem usque transactam induciis; contumaces adhuc partium animos, & utra ad alteram agendi caussa prior adiret, pravo certamine diffidentes, Legatus hilari semper vultu, quam apparatissimis epulis ad mutuos congressus, & opportuna colloquia sequester ipse admirabili patientia ac lenitate perduxit: posito utrobique domicilio prout res postularet ultro citroque vel aspera hieme, ac sæva tempestate concursans. Ad eas difficultates illud insuper accedebat incommodi, quod Sigismundus, & Maximilianus inter ipsam disputationem, Regis uterque sibi titulum pertinaciter afferebat. quem nodum Legatus ea ratione potissimum expediit, uti pro Sigismundo Regni Poloniae, pro Maximiliano Cæsaris, & Sacri Imperii vocabulis uteretur. Duos fere menses altercatio tenuit, arbitro semper, ac moderatore Legato, maturisque jam rebus, illud in primis acute, & sapienter ab eo provisum est; uti Rosenbergio Cæsarianæ, Zamoscio Regiæ Aulæ Principibus, ac majorem in modum appetentibus famæ, actionis universæ clausulam (de industria semet extremo colloquio subtrahens) & peractæ compositionis in speciem, decus palmamque concederet. Ea Legati moderatione delinitis omnium omnino mentibus, denique pax in hæc maxime pacta convenit. Ut inter Austriacum omne nomen, Regemque Poloniae, & populares, & stipendiarios utriusque, oblivione recentium, vetus amicitia fœdusque renovaretur. Uti Lubloam, & cetera ejusdem agri castella, vicosque cum omni bellico instrumento, & reliqua suppellectili Cæsar Polono intra diem certum redderet. Sigismundus Maximilianum sine pretio, & cum honore in patriam restitueret. Maximilianus omni jure Polonici Regni sine controversia cederet, Regisque Poloniae titulo in perpetuum abstineret. Sacramento aut alia sponsione sibi obstrictos Polonos omni religione, ac vinculo solveret; liberumque suffragium Ordinibus Polonis, si quo casu ad interregnum res rediisset, omnino relinqueret. In hæc, iurandum Cæsar, & Sigismundus per idoneos Legatos ab altero uterque

ad præfinitum diem exigeret. Eadem illa Maximilianus ipse cum primum suæ potestatis factus Silesiam attigisset, pari iurejurando firmaret. Hæc ferme a Legato Apostolico, Regnorumque procuratoribus communi consensu decreta. quæ propemodum ipsa Plezchinii Maximilianus Cancellario recepisse ferebatur. Ac Cæsar quidem, & Sigismundus nihil recusare, quominus ea persancte una cum Senatu, & proceribus approbarent. Prior Sigismundus, dein Cæsar, tactis rite sacris, conceptam iusjurandi formulam, & verbo nuncupatam, & scripto, missis in idipsum internuntiis, edidit. At Maximilianus Regis mandato e custodia dimissus, ingenti gaudio Silesiam versus iter intendit: dati præter ceteram turbam primarii Senatores duo, qui & abeuntem, intra fraternam ditionem usque cum dignitate perducerent, & perductum sacramento statim in easdem conditiones adigerent. Ubi Biturinium est ventum, cum de pactis, atque promissis appellaretur, equitum Germanorum, qui gratantes occurrerant præsidio freti, in magna nobilium corona est questus, quod e Polonis ii, qui suarum partium fuerant, contra jus gentium privatim, & publice vexarentur; dein quod ad iusjurandum attineret, conditiones pacis a procuratoribus utriusque Regni, se prorsus incio, atque inconsulto fuisse conscriptas; nihil se ex iis, quæ tali transactione continerentur, aut Cancellario, aut ulli hominum promississe; neque si promississet metu coactus cadente in constantem virum, ulla teneri vel obligatione verborum, vel officii verecundia; proinde comites abirent cum bona pace, neque ultra sibi ad iniqua confirmanda pacta, vel preces, vel contestationes obtruderent. Per hunc modum a Maximiliano Senatores elusi. Neque tamen iccirco inter utramque nationem concordia valido nexu firmata dissiliit. Instigantibus ad arma quamlibet multis, steterè dictis nihilominus Reges ambo; & perniciosi belli terrore soluta in multos annos Ecclesia.

Legatus Aldobrandinus tanta confecta re, gloria plenus Romam revertit, obvio ad portam Urbis more majorum omni Sacro Collegio, magnoque cum plausu universæ Civitatis exceptus, in Senatum venit: ibi cuncta ad bonitatem ac providentiam Christi Domini, atque ad Sixti Pontificis felicitatem ac sapientiam, nec non ad comitum legationis virtutem & industriam referens, de semetipso pauca ac permodeste: subjicientibus apud se multa, qui seriem totius rei gestæ, aut literis amicorum aut fama consentiente cognorant; fastigiumque in quod postea ascendit, in illa tum actione, plerisque ominantibus. Magnum præter hæc, & illustre dedit Apostolicæ integritatis exemplum, quod annuam trium auri millium e Bariensi vestigiali pensionem ab Sigismundo sponte delatam, non modo ipsius largientis benigna invitatione precibusque, sed ne Pontificis quidem hortamentis, ad quem super ea donatione scripserat Rex, unquam ut acciperet adduci se passus est.

est. At Sixtus tam secundo rerum Polonicarum eventu mire lætus, ingentes, uti æquum erat, grates Deo, superisque persolvit. Non tamen eadem ex Ecclesiæ Gallicanæ progressu laboris quotidiani solatia capiebat eo tempore Pontifex. Quippe cæsis, aut pulsis (uti dicebamus) hæreticis, quorum pars magna cum conjugibus liberisque e Germania profecti, opimos Celticæ campos occupare, atque in ipsa Urbe Lutetia domicilium collocare statuerant; Sixtus victoria utendum, & in ipsa Gallia Christi Regisque perduelles eodem impetu profligandos, ac delendos ratus, Henricum ad tam præclara trophæa per literas, perque Apostolicum Nuntium Franciscum Maurocenum Episcopum Brixensem (quem paullo post quo majori cum dignitate res gereret, ipsiusmet Regis rogatu, Sanctæ Romanæ Ecclesiæ Cardinalem, & Legatum a latere declaravit) hortari ac stimulare non desisteat. Ille quamvis id ipsum votis omnibus expetere sese affirmaret; tamen expeditionis differendæ moras aliam ex alia necere, inopiam caussari pecuniæ, non modo sacras decimas exigendi (cui nimio plus insueverat prædæ) sed etiam Ecclesiastica bona sensim alienandi efflagitare facultatem ac jus; fœderatorum Principum contumaciam, atque perfidiam accusare, qui communicatis cum Hispano perenni Galliarum hoste consiliis, non uno loco, ac præsertim in Piccardiæ ac Normandiæ finibus, ubi utique Hugonotæ essent nulli, clandestinos habere cœtus; oppida se invito munire; denique religionis obtentu imperium struere sibi non dubie pergerent. Lotharingiorum vero fratrum, ac potissimum Guisii prorsus intolerandam esse dominationem; plures ad eum, quam ad semet concursus hominum fieri; duas propemodum, se vivente, ac spirante regias jam nunc in Gallia conspici. orandum profecto Deum, ut hisce contentus, ab iusti Regis capite ac sanguine abstineat manus. Hæc nuntio, ceterisque suavoribus Hugonotici belli Valesius respondebat identidem: diuque apud se pensitato, qua maxime via, vel debilitandæ rursus, vel omnino solvendæ Janvillanæ conspirationi resisteret; optimum ante omnia visum animos eorum, qui Lotharingiis ex occulto faverent, Lutetiæ primum, tum aliis in Civitatibus omni arte nudare, ac deinceps e Tarquinii præscripto papaverum capita paullatim ac sine tumultu decutere. Hoc ille consilio Parisiis hiemem totam exegit, subdola comitate semet privatorum colloquiis, choreisque, & conviviiis inferendo; rimandis atque introspiciendis civium & peregrinorum voluntatibus, ac per eam dissimulationem vafritiemque satis comperto quinam præcipue Guisianas foverent partes; repente propinquis e locis præfidiarios partim Gallos, partim Helvetios ad septem armatorum millia Lutetiam evocat: ac vix dum certa luce ad portas Urbis, ad viarum aditus, perque compita & fora distribuit. Ejus machinationis rumor cum ad cives ante manasset (ut sunt ferme satellites regum ad commissa tegenda instabiles & infidi) ad subita omnia excubantes

in-

intenta cura Parisienses, Guisum e secessionibus, ubi tum fœderati concilium habebant, per trepidos nuntios accersierant; tali præside ac duce nihil metuentes gravioris incommodi. Ergo ubi primum dispositæ per Urbem prætoriarum cohortes apparuere, conclamatum a sexdecim viris est; viæque perangusto vix ad unius hominis transitum relicto spatio, partim crassioribus catenis, partim doliis trabibusque raptim interseptæ ac firmatæ præfidiis, & initio a Scholasticis factum quinquaginta amplius hominum millia momento in armis fuere. Hoc nuntio territus Rex, quod hujusmodi consternatio valde præter ejus opinionem acciderat, rixaque cum oppidanis contracta in mercatu maxime novæ (id loci nomen) Helvetii ad quadraginta ceciderant; extemplo misit e proximis amicorum insignes militum Tribunos, qui furentem iracundia populum accomodata ad tempus oratione lenirent. ii cum aspera non sine minis undique responsa tulissent, neque jam existeret ex aula qui sese concitatæ multitudini auderet objicere; eo decursum ab regiis est, uti Guisum ipsum domi in tanta rerum perturbatione quiescentem ad comprimendos motus, opemque Prætorianis ferendam suppliciter invocarent. ille propemodum inermis in publicum egressus quacumque se ostenderat, summos infimosque ex ejus ore pendentes blanda oratione permulcens populum ab inchoata jam cæde compescuit; & commemorando pericula seditionum, ac debitam Regiæ majestati fidem, servatæ denuo Reipublicæ decus eximium tulit. Constans fama est, Guisum illa die, nisi ambitionis ac perfidiæ notam extimuisset, summa totius Civitatis alacritate regium nomen invadere, inque ipsum Henricum in Regia Lupara latitantem arbitrato suo potuisset consulere. Sed is dum inanis popularis auræ, & infaustæ potentæ ostentatione contentus Henricum incolumem abire permittit; paullo post docuit eventu ipso, ferenda Regum ingenia moresque; neque antevertendam in eo genere numinis providentiam; magnisque, & arduis in rebus nequaquam agredienda quæ vel perrumpere nequeas, vel perpetrare non audeas. Namque dum ingentem trahens turbam Guisus celsa cervice vicos Urbis plateasque perlustrat, immodica sui nominis fruens gloria; Henricus metu, ne intra Luparam obsideretur, furtivo egressu tamquam animi causa, hortos in vicino peteret pedes paucis admodum comitibus; consensu postmodum equo Carnutum festine sese proripuit. cujus rei fama vulgata, confestim ad eum, & officii, & præsidii causa viri nobiles undique confluxere, atque interim Catharinæ matris industria, Guisii auctoritate sedato Parisiis utcumque tumultu, legationem Magistratuum nihil ab sese civibusque dolo malo tentatum fuisse purgantium, direptionis dumtaxat metu externorum militum necessario repressam audaciam; Henricus dolorem alte premens, in speciem clementer accepit; ac paullo post simulata erga fœderatos benevolentia, quasi Catholicum omne nomen, vel cum aliqua sua

indignitate condonatis Christo inimicitiiis, junctum sibi adversus Hugonotas vehementer optaret, conventum omnium Ordinum Bleſas in proximam æſtatem indixit: ubi communi conſilio compoſitis rebus, & emendatis, quæ in publicam rem privatamque irreperant, vitiis, omnium arma viresque in hæreticos verterentur; atque ita feliciffimum olim Galliæ Regnum, & Apoſtolica recta Romana religio in veterem ſplendorem ac firmitatem longo intervallo rediret. Simul, quo majorem diſtis fidem adſtrueret, Carolum Maynenſium, & Ludovicum Nivernenſium Duces, alterum in Delphinatas, alterum in Piſtones (quas maxime provincias hæretici jampridem inſederant) cum imperio deſtinavit. Hac ſpe inducti Catholici Principes plerique, & procuratores Civitatum Ordinumque Bleſas brevi tempore convenerunt: Guiſius aliquandiu incertus animi, ac Regis in ſe voluntati non ſine cauſſa diffidens, tamen advenit, atque ab Rege per ſummam humanitatem acceptus eſt: ab eodem inuſitati honores per idipſum tempus habitus fœderatis aliquot, & iis præſertim, qui Eccleſiaſtici Ordinis erant, ad graviores de publica re conſultationes extra ordinem adhibiti: quin etiam per ſpeciem offenſionis ablegati ex interiore aula, ipſoque conventu, qui Janvillanæ cauſſæ maxime inſenſi, inſeſtique habebantur, ac nihil propalam omiſſum, quod ad Guiſianos deliniendos ac demerendos tali tempore pertineret. Interea tamen Rex, & ipſe per ſe, & per ſolertes callidoſque emiſſarios oratione ſuſpenſa, variisſque interrogationibus explorare clam inſtitit, num qua ratione Guiſius per appoſitos accuſatores, die ad concilium diſta, læſæ majeſtatis & aſſectati Regni crimine poſſet everti. Ubi pertentata, quod ſatis erat delatorum telis impenetrabile, flagrantiffima nobiliſſimas apud Civitates gratia, & ſi ex aperto peteretur, omni coitione manuque ſuperiorem animadvertit; dolo ac fraude contra inviſum ſibi pridem caput, nullo Dei hominumque reſpectu graſſari conſtituit. Queſtus diuturna Galliæ mala, diſtractas voluntates opeſque, & inveſta Dæmonum inſtinctu nefaria dogmata, licentiamque vivendi; feria ſexta (qui dies fuit decimus Kal. Januarias) ſacrificium ad placandas cœleſtes iras, corpusque Chriſti ſumendum uti ſolebat, ædiculam ſuburbanam indicit; ac protinus ex aula, quo proceres deliberandi gratia de more convenerant, in ſuperiores ædium partes per cauſſam arcani colloquii Guiſium accerſit; eodemque temporis momento e fœderatorum numero Carolum Borbonium Cardinalem regii generis, Ludovicum item Cardinalem Rhemenſem Archiepiſcopum, Guiſii fratrem, una cum Petro Archiepiſcopo Lugdunenſi, ac præterea Guiſii filium tenera admodum ætate, & Dynaſtas aliquot ejusdem propinquos, alioſque nonnullos ex eadem ſocietate in cuſtodiam tradit, Chriſti natalitiis imminentibus. Atque ipſe quidem Guiſius abditis intra aulae percufforibus, deliteſcente in penetralibus Rege, continuo trucidandus obijcitur; ac biduo poſt (qui dies erat

Ste-

Stephano Protomartyri Sacer) Ludovicum , a quo inauguratus ; & sacro delibutus chrismate fuerat , a Petri complexu illacrimantis avulsum , Rex pari genere leti maculavit . exanimis jam artubus adjecta per sævitiam vulnera . gratissimum inde spectaculum hausit Henricus , tamquam e diuturna sollicitudine ac metu sese tum denique Regem esse pronuncians . Neque satiatus vivorum infando supplicio , cremati corporis utriusque cineres , patrio in perduelles genere pœnæ , sepultura prohibitos , in profluentem abiecit . Ac ne duo quidem Guisiorum proximi absentes Mayneus frater , & Aumalius Parisios nuper e Piccardia delatus ,
 Urbem , seque ipsum firmissimo præsidio muniit , & e Valesianis circiter octingentos in vincula coniecit ; qua in Urbe thesauris jam ante correptis , occupatisque navalibus , a Luparæ ipsius direptione vix ægreque temperatum est . Mayneus Lugduno , ubi tum ipsius Henrici (uti dictum est) missu in Delphinates hæreticos exercitum comparabat , in Burgundiæ (cui dudum provinciæ præerat) tuta loca sese recepit , irarum molem ex alto ciens , & parricidæ Henrico novissima exempla minitans , brevi affuturus in ultionem ; undique auxiliis haud sine causâ confusus , quippe super vetera Valesii , vel probra , vel ausa , recens ejusmodi facinorum atrocitas haud dubie novas Regis invidiæ subdiderat faces , ut quacumque incederet ipse , aut facti fama , vulgo eum Catholici execrarentur . neque execrationes in irritum jactæ ; quemadmodum in loco reddemus . Luxere & Guisum , & Cardinalem omnes fœderatæ civitates , Lutetia maxime , & exquisitis honoribus amborum exequias , ac nomina prosequi Cives tali obita morte ; haud dubie Christi martyrem utrumque appellantes ; & suis orbatî amoribus , cum aliquandiu lamentis cuncta complerent ; Senatu super tali casu aliquoties habito , tandem eo devenere , uti communi decreto quandoquidem innata Gallis vel injusti Domini patientia , Regem inviolatum , intactumque præstaret ; a Summo Saltem Pontifice per literas , Oratoresque acre judicium inauditi sceleris , ac spretæ religionis dolenter exposceret . Sixtus audita duorum Lotharingæ Principum acerba nece , justis de causis omissa Guisii mentione , Cardinalis exitio apud Senatum vehementer indoluit ; Regisque in eo immanitatem , ac sacrilegium detestatus , de Patrum sententia per monitorium libellum diras omnes Valesio interminatus est , nisi & Cardinalis interemti rationem redderet , & inclusos aliquos Sacerdotes quamprimum liberos abire permetteret . Interea Carolus Emmanuel Philibertus Subalpinorum , & Sabaudiz Dux , Philippi Regis Catholici gener , juvenis ferox , nec satis dum adversis rerum eventibus ad cunctationem eruditus ; dum Galli ad internecionem inter se contendunt , ad occupandos in proximo Salassiorum fines dissimulanter animum intendit . Subalpinæ regionis in Occidentem claustra firmissima ; ac proinde tenenti

nenti ea Gallo transitum in Italiam præbentia. peditum octo millibus, equitibus ferme sexcentis, Carmaniolam primum ejus tractus oppidum, & situ & opere munitissimum, ostentata in speciem aliquot dierum oppugnatione, sed præfecti (uti creditum est) avaritiam emeratus, brevi recepit, cum arce ipsa; quam in arcem Galli post Cameracensem pacem detracta variis e locis muralia & campestria tormenta circiter septingenta condiderant. Carmaniola accepta, iisdem artibus deinceps Salassiorum Urbe potitur, quod caput est gentis: itemque Centale, Rivellio, aliisque non levis momenti Castellis, quæ modico & male fido Henrici Regis præsidio tenebantur. Hoc tanto, tamque repentino motu; Carolus cum præclare intelligeret quantum sibi apud omnes nationes conflaretur invidiæ; confestim & per literas plerisque nominis Christiani Principibus, & Legatis eorum apud se commorantibus coram exposuit, se ad occupandam Salassiorum ditionem; tribus maxime de causis adductum fuisse. Studio primum Divini cultus, ne tam propinquis e locis Calviniana pestis in Italiam irrumperet; dein amicitia, & cognatione Regis Henrici, cujus ad famam, atque ad imperium pertineret, improbos ejus ministros, venalesque, & occulta cum Hugonotis habentes colloquia, quamprimum e regis præfecturis, atque præsidii exturbari; quippe qui etiam oblata non semel ab se ad fidiorem tutelam auxilia, superbi pariter, ac malitiose rejecissent; postremo, quod suæ, suorumque salutis non mediocriter interesset, impia conscleratorum arma ab Taurinensi limite quam maxime procul haberi. Ceterum ad amoliendum omnem ab se cupiditatis notam prorsus deliberatum fixumque sibi esse ea ipsa, quæ invasisset loca, dum Gallicana procella defæviret, vel vicario, vel fiduciario nomine integra & illibata Henrico quam optima fide servare. Sub hanc orationem, & scriptas quoquoeversum epistolas, certum insuper hominem ea ipsa de re in Galliam misit; cujus legatione placatus in præsentia Rex, Caroli acta meliorem in partem visus accipere. At ubi destinato mox novo in Salassios præsidi Ramboletto verba dari, & variis commentis, ambagibusque restitutionem extrahi, & majestatem suam eludi animadvertit; enimvero implacabili exarsit iracundia, ad repetendas doloris sui pœnas extemplo ducturus, nisi eum Blesensis conventus nondum confecta negotia, & Parisiensis, aliarumque Civitatum acerba defectio, frementesque hinc Hugonotæ, inde Catholici, & alia propius ruentia distinuissent mala. Sane ceteros quoque rerum humanarum spectatores inopinata Caroli pertinacia vehementer offendit. Philippus ipsemet Socer Apostolico Nuntio sciscitanti ecquid fuisset ejus consilii particeps? ecquid actionis in Salassiam ditionem Philiberto competeret? se prorsus inscio rem accidisse, & Jurisconsultum egregium Franciscum Veram in Taurinos, ad totam causam probe cognoscendam brevi missurum esse respondit. Sixtus dumtaxat, cui arcendæ contagionis hæ-

reticæ antiquissima erat cura, neque improbavit factum, & turbidis adeo Galliæ rebus, inque Italiæ faucibus hærente sagacissimo novatorum antesignano Digueria, Subalpinum omnem agrum, & incertæ fidei loca interim a pio & strenuo Duce, pro Rege obtineri lætatus est. Eodem tempore de Hispanicæ classis progressu valde sollicitus, quam ex Olyssiponensi portu paullo ante profectam esse constabat; Alvaro Bazanio vita functo, cui uni, & expeditionis regimen, & victoriæ palmam vulgo desponderant; suffectoque Methymnæ Sidoniæ Duce Petro Lupio Guzmanio, clarissimo viro illo quidem, verumtamen rei bellicæ, ac maritimæ præsertim haud ita perito. Ad ejus classis famam Angla pseudoregina, suis rebus haud sine caussa metuens, omni dudum arte coratuque sese paraverat. Ac primum verita ne Jacobum Scotiæ Regem Philippi artes, & pius & justus e matris nece dolor, & facta nuper in Scotiæ agrum ab Anglis incurso, Catholicas in partes ingenti suo periculo traheret; Legatos ad eum misit, qui maternæ cædis culpam in quotidiana Romani Pontificis, & Philippi tentamenta, crebrasque popularium conjurationes, ac demum severa Senatus Anglicani judicia transferendo, Elisabetham alioquin optima in Mariam voluntate fuisse affirmarent: in Scotiæ agrum a limitaneis præfectis, ut sit, ipsa plane insciente, incursum. qui tamen profligati, cæsi que meritis audaciæ pœnas dedissent. Ceterum quando præterita revocari non possint; suæ, suorumque incolumitati Rex, tam aspera instante procella, consulere: ne sese ab callido sene speciosis pollicitationibus in fraudem induci, permetteret. Italiam universam una cum omnibus ferme Tyrrheni maris insulis, partim illi stipendiariam esse; partim per factiones, ac largitiones obnoxiam: Germaniam superiorem magna ex parte a propinquis ejusdem Austriacis longa majorum possideri jam serie; inferiorem, quod jura vetusta, legumque socialium fas repetierit, prima nobilitate propalam interfecta, intolerabili jugo dominationis oppressam. Lusitaniæ Regnum ambigui juris, vel pulsus, vel circumventis, vel absterritis metu competitoribus interceptum: Galliam porro, quæ una ipsius conatus valeat impedire, ejusdem astu implacabilibus discordiis irretitam. Ab eodem immensa in Occidentem spatia, cum opimis argenti, aurique fodinis, necnon ampla, & quæstuosa Orientis emporia inanibus conquestionum titulis obtineri. Postremo Angliam totam specie religionis, revera ditionis proferendæ, suosque ditandi satellites, hianti cupidine peti. Quid jam reliquum esse quominus ad unius libidinem omnium rerum potestas, arbitriumque perveniat? Proinde si qua Jacobum suæ dignitatis ac libertatis teneret cura, omiſſis cum finitima, & consanguinea Regina diffidiis, animo ingenti sese ad patriam ab Hispanorum aut vi, aut insidiis tuendam, Elisabethæ exemplo, & auxilio compararet, vel resistendum obnixè orbem terrarum affectantibus, vel sceptrum jam tum utrique abji-

abjicienda, regnoque protinus excedendum esse. Hisce auditis, vera, & prudenter prospicere, & fideliter pronunciare Elisabetha Jacobo, & Consiliariis visa. Ergo ut communis ab externo pavor vel inimicissimos inter se connectit; pax & societas nationem inter utramque levi momento coaluit. Per hunc modum reconciliata cum adolescente amicitia, compositisque in proximo rebus, ad præcavendos internos motus acrius multo, quam solebat, incubuit. Erat in Anglia magnus eorum numerus, qui ab recta in Deum fide, atque ab auctoritate Romani Pontificis nullo exilii, proscriptionis, pœnarum, aut necis exemplo absteriti, arcanos cœtus ritu nascentis quondam Ecclesiæ, & pia colloquia, & statâ sacrificia celebrabant. Ex iis Elisabetha nobilissimum quemque, & præcipua apud plebem existimatione suspectos, quamquam metu ne proderentur, seu peregrinæ dominationis odio, sua in bellum studia ac nomina profitentes; tamen dum tempestas transiret, in custodiam dat. Simul toto Regno juventutem, accitis e Belgio veteranis, conscribit, atque centuriat. & delectu coactio supra centum armatorum millia, copiis ita distributis, uti mediterranea regione haudquaquam præfidiis destituta, circa maritimam oram, quacumque ap-
pulsus maxime timeretur, eo confestim quina dena circiter millia propugnatorum occurrerent: ipsa dein cum paucis lustrat exercitum, ordinesque subinde interequitans, cunctos ad superbum avarumque ar-
cendum hostem, ac pro focus arisque acriter dimicandum, intrepido vultu laudibusque ac promissis accendit. Classem insuper centum amplius navium bipartitam, insignibus navali gloria præfectis, in quibus Franciscus Dracus eminebat, plurimo cum honore verborum attribuit. Eadem tempestate Farnesius validum in primis exercitum Philippi jussu contraxerat; cum Guzmanio pariter in Angliam trajeturus: equitum peditumque ad quadraginta millia miro in hæreticos ardore convenisse ferebantur. Destinata ad recognoscendum oppida maritima duo, Neoportus, atque Duncherca. Adversus id malum Elisabetha Batavas mari præpollentes, ac sibi tum causæ communionem, tum latis haud semel genti suppetiis vehementer obstrictos, quam instructissimis navibus, e proxima statione accessus, egressusque hostium obsidere, atque omni ope providere jussit; ne duo duces tanto cum apparatu in Anglicani Regni, sociorumque perniciem, arma, viresque conjungerent. Interea Philippi classis admirabili expectatione, uti memoratum est, e Lusitania solverat. trecentæ ferme varii generis erant naves; insana magnitudine complures, arcium instar. in iis præter immensam nauticam turbam, milites partim mercenarii, partim voluntarii, admixtis proceribus, atque Dynastis numerabantur ferme triginta, hispani omnes, paucis admodum exceptis, quo penes eam nationem præcipuum Angliæ subactæ decus, ac præmium foret. Majora, minoraque tormenta pro navium amplitudine, ac numero; gladiatorum, hastarum;

telorumque non modo in usum classis affatim, sed etiam ad instruendos insulanos inermes; quandoquidem exulum spes admota cupiditati ad prima conspecta Hispanorum signa, magnam Catholicorum vim, obsequio promptam ad litus obviam fore sponderat. Hac tanta virium mole circa Maji mensis finem, quamquam adverso vento (quando Philippus per literas, nuntiosque pro imperio urgebat) e portu egressos, moramque haud procul ab terra vario velorum flexu trahentes prospera per aliquot dies aura promovit: plenisque velis in Septentrionem euntes, atrox repente circa horam Calaicam tempestas adorta disjecit. Guzmanius, dum reliquum procellæ exlæviret, ad Corunias emporium ejusdem oræ tamdiu stetit, quoad per speculatorias admonita, reliqua classis eodem conveniret. Inde proræ in Anglicanum directæ fretum, quod illi nomen fecit in arcta unius diei spatia ab Gallico, & Anglicano litore coactus Oceanus. Ibi primum hostes apparuere, & Guzmanius occasione pugnandi lætus classe ad confligendum instructa, hostem ad universum certamen diu est conatus elicere. Ille viribus longe impar, uti a conferenda cominus manu consulto abstinebat, ita Numidicum in morem laceffendo invicem, ac refugiendo, magnitudine inhabiles, & oneratas comeatu adversariorum naves, æstu, ventoque ex arte prærepto, mira velocitate, & agilitate, nunc ab tergo, nunc a lateribus fatigare, distrahere, avullas ab reliquo agmine circumstiteri. & eo ipso die forte accidit, uti Petri Valdesii Legati egregia navis, qua, præter ceteram non levis pretii suppellectilem, quadraginta auri millia in militum stipendia vehebantur, distracto crebris tormentorum ictibus malo subsisteret. Cumque ab antecedentibus vento ingruente, ad subveniendum, vela demitti non possent, in eam frustra molientem ab Anglicis duabus; illico impetus fit. Dubio eventu aliquandiu certatum. Superveniente dein cum alia manu Francisco Draco, Valdesius amissis e suorum numero circiter quadringentis, vivus excipitur. navis cum dite gaza, tormentisque ad quinquaginta, in Angliæ portum nomine Plemuthum abducitur. Inter quæ Guzmanius præmonito perquam accurate Farnesio uti paratas ad litus haberet copias, dum ab eo responsum expectat; progressus inde, nec levibus ab hoste detrimentis acceptis, e regione Caletii, (qui locus Gallico tum præsidio tenebatur) ad Jecium portum (Cæsaris fuisse multi conjecant) haud ita longe a Dunquerca ancoras jact: deque rerum suarum statu rursus Farnesium per certos homines edocet. Ad eam infestandam stationem, classemque diffociandam insigni calliditate Dracus ludibrium tale commentus est. naves octo jam putres ac vetustate fatiscences, multa oblinuit pice; inditoque sulphure, & aliis ignium alimentis accensas, æstu pariter, ventoque secundo in hostes immittit. Eo spectaculo perculsi Hispani, præsertim ii, qui superioribus annis in Belgio militaverant; istique recordatione ardentium in

Schal.

Schaldis flumine machinarum, sepulcrales, molaresque ex imo lapides, miseranda cum obvii cujusque strage eructantium; eandem profecto imminere pestem exclamant pavidī, atque Antuerpianos ignes. Tum vero, ut in re trepida subitaque, hæreticis procul effuse ridentibus, vel gubernatorum injussu ancoras tolli cernentibus, aut ne morarentur, funes certatim abscindi; nautarum ministeria militum discursibus impediri; jussis jussa turbari; dissonis vocibus, monitis, minis, universa compleri. Nec defuit opportunitati Anglus. consueta pernicitate, ac pelagi, ventorumque notitia, eximiaque jaculandi arte, dissipatum hostem eo die, proximisque vehementer afflixit. primariæ aliquot Hispanorum naves partim in terram ejectæ, partim expugnatae, partim continenti verberatione solutis compagibus in omnium conspectu demersæ. Jamque Hispanum super alia incommoda, telorum quoque & cibariorum penuria majorem in modum angebat; vel adulteratis, vel maligne præstitis Olyssipone mancipium fraude commeatibus. Hinc omnium animis a fiducia priore ad summum timorem, mæstiamque traductis; una spes reliqua videbatur, si Farnesius e vicinis locis opem ferret; junctæque in unum copię, præruptis adversariorum ordinibus, in Angliam penetrarent. Sed neque Farnesius tantum egregiæ pubis, tot veteranorum cohortes, equitumque turmas, unicum vel tuendæ, vel perdomandæ Belgiæ firmamentum humilibus apertisque, & plano ad subsidendum alveo navigiis furenti Oceano committere audebat; præsertim adverso per eos dies vento, & Batavorum, Anglorumque classibus minaci fronte imminentibus; & Guzmanium, quo ne propius occurreret, carinata, præcellæque naves, & insidiosa passim brevīa, syrtesque terrebant, vel hostilibus vel importuosis utrimque litoribus. Ita dum Duces ambo inter conandi, cavendique consilium non sine causa fluctuant; ecce tibi a meridie vehemens Africi vis tanto impetu Hispanica vela corripuit, ut Guzmanius iter, cursumque in Septentrionem dirigere sit coactus. Neque a vexando agmine extremo abstinit Dracus, quoad totum emensa fretum Catholica classis in Germanicum Oceanum ad novas calamitates evaderet. Tum demum Angli magna, nec tamen incruenta victoriæ læti, cum spoliis opimis, nec modico captivorum numero domum ad expectatos triumphos, & optata præmia revertere. Hispanicæ naves cum pleræque fuis armamentis, Oceani truculentiam minime sustinerent; omisso magisterio, aliæ fluctibus haustæ, aliæ ad ignotas insulas in prædam barbarorum allisæ. Rostrata florentina celox una prænobilis in Scotiæ oram delata, cum haud procul a litore constitisset, ab Insulano quodam missilibus appetita flammis, cum eæ flammæ in pulverem tormentarium incidissent, dissilientibus cum horrendo fragore lateribus, ac tabulatis interiit. Guzmanius cum iis, quas ad se cogere potuit, longius ab terra Scotiæ promontoria circumvectus, perque Hibernicum

mare

mare in Hispaniæ conspectum appulsus, atratos ad Regem præmisit Nuntios, qui adversum expeditionis eventum præfagientibus, ut fit, popularium animis explicaret. Ex tanto navium numero sexaginta vix, eæque magna ex parte laceræ, mutilæque; e tanta hominum copia non plus decem millia supererant; iique ipsi vulneribus, fame, siti, vigiliis, & longa navigatione confecti. Ad infelicem eam turbam pro christiana charitate refovendam solandamque Rex, quamquam ingenti ipse dolore affectus, idoneos viros cum auri quinquaginta millibus in Gallæciam destinavit: & quoniam novi subinde Nuntii de clasticorum exitio, afferebantur, magnoque in luctu universa erat Hispania, cum amicos hi, cognatos illi, cum lamentis, gemituque desiderarent; Philippus ad evitandam nobilitatis vim, plebisque consternationem, publice complorari defunctos, vestemque mutari, nisi ab arcta admodum propinquitate conjunctis, edicto prohibuit. Guzmanio Imperatori, non minus animi, quam corporis ægritudine laboranti, uti recta domum ad suos valetudinis curandæ causâ concederet, benigne permisit. Hæc tanta, tamque inopinata Hispanorum clades hæreticis interim exultandi, Catholicis moderandi animos, rerumque humanarum imbecillitatem agnoscendi; cunctis divina judicia cum timore, ac tremore pensandi, satis amplam in multos annos materiam præbuit; ac simul dilati sapienter a Sixto subsidii, vel iniquis, & obtrectatoribus apertam confessionem expressit. Farnesius pereuntem regiam tanti nominis, & impendii classem (auri centies & quadragies in eam infumta constabat) e specula miseratus opitulandi potestate præcisa; deque præsentis spe dejectus Angliæ primum, dein Hollandiæ, & Zelandiæ potiundæ, ad maritimæ rei damna, terrestri bello aliqua saltem ex parte sarcienda sese convertit: receptamque per eos dies ingenti labore Bonnam, quam priore anno per insidias captam a Schenchio Calviniano retulimus, & Archiepiscopo Coloniensi restitutam Hispanico præsidio, ipsius Archiepiscopi voluntate firmavit. Posita deinde a Mansfeldio Legato castra ad Vachtenducum, quo præter Batavorum cohortem deditionis Germani a Bonna sese receperant, finesque Raremundæ Urbis, & omnem circa agrum latrociniiis, ac rapinis infestum habebant; aliquot oppugnationibus multa cum strage defatigati, ad extremum, exeunte Decembri, sese Mansfeldio permisere. Batavi, ex conditione, cum singulis gladiis, & candido scipione dimissi. Germanorum arbitrium, qui deditionis pacta violaverant, absenti Farnesio reservatum est. Hæc ferme in Christiana re variis Europæ locis, anno sæculi hujus duodenonagesimo gesta. Solutus dein Blesensis in Gallia conventus haudquaquam satis digno operæ pretio; quippe vel metu, vel odio Henrici ab Guisiana cæde paulatim dilapsis regni proceribus, ordinumque procuratoribus. Horum testimoniis, dum apud suos quisque cives Regis perfidiam atque immanitatem accusant, recrudescere, supraquam credi

credi possint, hominum iræ; tantum facinus, nulla interposita mora, vindicandum, neque ultra ferendam importunissimi tyranni malitiam; audaciamque, frementium. Neque interea Henriciani, (quos alii regios, alii politicos, quidam etiam atheos vocitabant) quamquam haud exiguo numero, tamen aut sociare consilia viresque, aut furenti multitudini ac magistratibus, arciumque præfectis opponere semet audebant: tanta, tamque subita rerum conversione, perterriti silentio, ac simulatione transitum tempestatis opperiebantur. atque iisdem fere diebus super eo statu consulti Sorboniani Theologi; Senatum, populumque peracto sacramento solutos in Regem, & parricidam, & Numinis æterni contemptorem, verbo pariter, ac scriptis incenderant. Reliquum videbatur esse, uti Sorbonianam sententiam Pontifex Maximus Apostolica auctoritate, ac judicio comprobaret. Is ubi post aliquot monita obduratum nihilominus in contumacia, ac retinentem in custodia Sacerdotes, intestabilem, & sacrilegum, & hostem Ecclesiæ declarasse visus; tum vero velut abruptis imperii frenis, depositaque omni formidine, Parisienses detracta e publico, privatoque Regis insignia lacebant: inque absentem certatim probra, & contumelias jaciunt: ad vindicandam Lotharingiorum indignissimam necem, itemque violatam infando perjurio publicam comitiorum fidem, ac libertatem, tollendosque regiæ superbix, libidinis, & avaritiæ ministros, sese mutuis adhortationibus incitant. Mayneum firmo cum exercitu adventantem, utpote vacuo Valesiorum solio Interregem summa cum potestate renunciant. Denique prioribus in dies iracundiæ stimulis veluti uno contactu, Gallia usque adeo exarsit; uti e tam multis, ac tanta celebritate provinciis, tria dumtaxat oppida Turrones, Baugentia, Blesæ in Regis fide permanerint. Ille, quo mitigaret animos, blando rursus edicto comitia, unde abierant revocare conatus, cum acerba, nec sine irrisu responsa tulisset; aperte monstravit quantopere tum a ceteris mortalibus, tum ab iis præsertim, qui in alios imperium exercent, veritas & constantia dictorum colenda; quamque sit damnum existimationis irreparabile. Ab ea frustratione in rabiem actus fœderatos omnes, quique eorum ductum & consilia sequerentur, seditiosos ac perduelles, & Regiæ Majestatis violatæ manifestos publice declaravit: sibi que magis metuens a Blesiis haud ita munito loco Turronium, validam Urbem cum prætoriano milite, & primariis aliquot e nobilitate sese recepit; eodemque ad voluntates Civium demerendas ab Lutetia Curiam, & judicia transtulit. Ibi a Mayneo propemodum oppressus, cum accita ab Helvetiis, aliisque nationibus auxilia morarentur, incertus consilii, variis curarum æstibus angebatur. Hæc omnia dudum veluti e specula Navarræus observans, inque omnem eventum haud absurde ratus Henrici amicitiam sibi ad Regni successorem magni fore momenti, suam illi non semel tam arctis in rebus operam, studiumque

diūque detulerat. Quæ Rex novæ infamiæ metu cum aliquandiu respuisset, ad extremum ab aliis fere desertus accepit: ac Navarræo, captis per eos ipsos dies aliquot Pictorum oppidis, prospere admodum agenti, sese permisit. Jamque fœderati aliquot populi, vel ingenii mobilitate, vel tædio confecti, vel desiderio qualiscunque Regis nutare in officio, & in communi causâ cœperant. Silvanectum in primis, quod abest Lutetia non plus triginta millia passuum, instigante regiafactione ab societate descivit. Eam Urbem Aumalius tumultuaria manu cum recuperare tentasset, superveniente cum veteranis cohortibus insigni Hugonotarum Duce Nonio, haud sine gravi damno repellitur: & Mayneus per idipsum tempus, exercitu ob inopiam stipendiorum valde imminuto, ab Turonibus Lutetiam regressus, ne caput rerum defereret, politicis præsertim in omnem prodicionis occasionem intentis; intra mœnia sese continebat; Parisienses coram, & socios per literas, nuntiosque subinde confirmans. Interea Reges ambo junctis copiis, ac fœdere propalam, cito ante omnia statuere Lutetiam ipsam Urbem ad terrorem aliarum ferro ac fame subigere, haud ignari paucorum dierum inesse alimenta, plurimumque imbellis, & inconditæ multitudinis, quippe cum incolarum quadringenta fere millia censerentur; iique vel deliciis ob magnitudinem divitiarum, vel studiorum otio, vel mercaturæ, aut opificiis, diurnoque labori ob inopiam dediti. Simul regionum opera, tumultus ac seditio sperabatur. Ergo castris non longe ab Urbe locatis, atque ad subvectiones arcendas circummisso equitatu, & stationibus ad opportuna loca dispositis, Parisienses brevi ad rerum omnium penuriam redacti, vix paucos dies obfidionem toleraturi videbantur, & seditiosæ passim audiebantur voces pacis bona, Regisque fidem efflagitantium. Neque Mayneo ad comprimendos motus ejusmodi sat virium suppetebat. Inde Guisianis primo pavor, tum desperatio; & Valesio capta Pontifara, & Ponte Sancti Clodaldi occupato, propediem utique patuissent portæ, nisi certa jam victoria læto, & quo maxime genere pœnæ rebelles afficeret agitati, atrox & novus ab omni memoria casus intervenisset. Gregarius quidam erat Parisiis e familia Dominicana Sacerdos, natione Sequanus (Jacobum Clementem appellabant) annum agens ætatis tertium circiter, & vigesimum, ingenio perquam apertus, ac fatuitati, quam solertiae propior. Is periniquo ferens animo Gallicanam avitæ Religionis arcem, & liberalium artium officinam ab eo, qui se Christianissimum ferret, diris adeo modis tam acerbe vexari, divinarum legum interpretes quosdam semel atque iterum interrogavit, jure ne posset barbara feritate perfidiaque Tyrannus pariter, & anathema de medio tolli. Cum illi posse nec sine magno quidem merito censuissent; imminente jam Urbis deditione tam gloriosam (uti rebatur ipse) palmam publicæ salutis amantibus omnino præripere statuit; neque plane celabat

con-

consilium ; in circulis , & colloquiis Valefii favitiam , atque improbitatem sine fine detestans ; brevi se universo hominum generi sermonem in multos annos daturum , cunctis irridentibus , affirmabat . Quod fando persuadere nemini valuit , hoc postmodum ipsa re , factisque præstitit . Sacrificiis , precibus , lacrimis , aliisque piamentis (quo spiritu incertum) octo ipsos dies cæleste Numen sibi propitiare perrexerat . Dehinc secunda mente , vultuque prorsus intrepido pridie Kal. Augusti fratribus etiam atque etiam valere iussis , in castra attrito vestitu , despicabili vultu contendit . Sciscitanti vigili arcana se mandata cum literis ad Regem habere , ipsoque convento sibi opus esse respondit . Ab Guelio deinde Regis procuratore , cum is nihil tali tempore spernendum existimaret , postridie mane ad Henricum adhuc seminudum in penetralia est introductus : dehinc remotis confestim arbitris , mandata quædam venerabundus exponit , ac simul ab amicis reddit epistolas . tum repente succedens venenato (uti ferunt) cultro , quem manica tectum gerebat , incautius legenti suffodit inguina . Rex vociferans eodem extracto ferro percussorem in capite vulnerat ; advolant stipatores , perque iram non expectata quæstione Clementem repetitis ictibus contrucidant renidenti similem , atque uti semet ad novissima quæque jam ante paraverat , nequaquam sibi caro tantum stetisse facinus in extremo spiritu gloriantem . Vulnus deinde inspicunt medici : neque letale initio visum ; & Henricus ad sedandos tumultus paullo post exercitui sese ostendit , eumque diem per jocos , lususque consumpsit . Ingruente demum nocte intumuit plaga , perforatumque intestinum certis experimentis apparuit . Superveniente dein febre vehementi , cum deficerent vires , accitis ad se proceribus mandata , ut fertur , in suæ necis affines ultione , Henricum Borbonium Navarræum , Regni heredem disertis verbis publice declaravit . Sub hæc ingenti suorum dolore cum expirasset , militari funere , quod ab hoste Dionysiana tum Sepulcra tenerentur , ad oppidum Piccardiæ Compendium exigua pompa translatus ; ibidemque tuto interim loco depositus est . Jacobo Clementi , quod sponte vitam in causa Catholica profudisset , cælestes honores cum inclyto Martyris Christi vocabulo a Parisiensibus decreti . quæ tamen sanctio , utpote nulla Pontificum auctoritate fulta , postmodum evanuit . Interfecto Valefio Principes Regii generis quotquot in Castris erant , collatis inter se capitibus , ne per ipsorum dissensionem externo cuiquam ad imperium patesceret aditus , Navarræum jure sanguinis legitimum Galliæ universæ Regem sine mora consalutarunt ; ea tamen lege , uti Apostolicæ Religionis professionem , ac tutelam in sese jurejurando reciperet . quod ille recepit , modo sibi per idoneum doctorem errores eriperentur , jam inde ab infantia per domesticos magistros inoliti . Principum exemplum sequuta confestim reliqua multitudo , paucis tantum e nobilitate exceptis ; quo vel privatas ob causas , vel hæresis nomine ;

ab Navarræo alieni, ac velut exauctorati morte Catholici Regis, domos quisque suas diverſi abiere. A fœderatis contra (quamquam admodum ſero) Carolus Borbonius Cardinalis Navarræi patruus cum adhuc in cuſtodia teneretur, publice item Rex appellatus. Ita in duas factiones diviſis Gallorum ſtudiis, ab utraque Orator petendæ confirmationis ad Pontificem Maximum eſt deſtinatus. Ab Navarræis Franciſcus Luxemburgius, idem, qui Pontificatus initio venerationis & gratulationis cauſſa, Romam a Valeſio venerat. Ab adverſariis Jacobus Dionius e Hieroſolymitana militia vir, & genere & religione conſpicuus. Ac Luxemburgius quidem licet Navarræum, & ad converſionem ex animo pronum, & ad accipiendas ab Apoſtolica Sede quaſlibet conditiones paratum affirmaret; tamen ut in re admodum ancipiti, & perobſcura, non modo in Senatum publice, ſed ne ad Principis quidem aures privatim, niſi lente, perque ſummam cautionem, admiſſus eſt. Subdolam, & ambitioſam, & in tempus fictam Regis pœnitentiam vulgo interpretabantur. Dionius cum favore acceptus non modo fidem adverſæ parti abrogare conatus eſt; ſed etiam denunciando, inſtandoque pervicit, uti ad ſuſtentandas adverſus hæreticorum inſidias & machinamenta, antiquam religionem, auctoritatemque Romani Pontificis, revocato Mauroceno Cardinale, quod ob arctam cum Henrico Rege amicitiam, Lotharingio ſanguini ſuſpectior, atque inviſior eſſet; novus e Principum numero Legatus in Galliam primo quoque tempore mitteretur. Miſſus a Sixti latere cum Pontificum, ac Teologorum delecta manu Henricus Cajetanus Romanæ Eccleſiæ Camerarius, vir nobilitate, doctrina, moribus, opibusque præcellens. Paulo antequam hæc in Gallicana cauſſa gererentur, Anglum propudium Eliſabetha Hiſpanorum anni prioris accenſa conatibus, itemque ſecundis præter ſpem ſuis rebus vehementer inflata, ingentem claſſem adornaverat, quindecim fere millibus bellatorum impoſitis (quæis Franciſcus Dracus & Eduardus Horrejus pari cum imperio præerant) ad Philippi metalla in ultimis terris (quod fruſtra jam ſæpe tentaverat) invadenda, nec non ad ampla, & frugifera cocci, glaſtique commercia ab Hiſpanico litore in Angliam transferenda. Perniciem hanc Deus rerum humanarum per vices plerumque moderator æquiſſimus, ab Hiſpanorum fortunis per hunc maxime modum avertit. Antonius erat æmulus Philippi Regis, commiſſo temere cum Hiſpanis prælio, dudum e Luſitania profugus, cui quod magnum popularibus deſiderium ſui reliquiſſe diceretur, tutam, honoratamque in Anglia Sedem Eliſabetha præbuerat; Philippo, ceteras inter minas armatum ab ſe quoties expediret, in patriam rediturum oſtentans. Is, ut ſunt exulum ſpes ad ſuadenda quæ cupiunt nimio plus facundæ, immenſis pollicitationibus Reginam, & Conſiliarios denique induxit, uti priuſquam Hiſpanus a maritima prioris anni ſeſe reficeret clade, paratas in

Peruana litora vires, duce, vel comite sese in Lusitaniam flecterent. Igitur a Plemutho profecta classis, Oceano transmissa, ad Corunnias circa Maji mensis initium appulit. Facta ibi descensio: & diebus aliquot in oppugnanda Urbe nequidquam absumtis, Piscaria suburbio dumtaxat incenso, ad Penicum oræ Lusitaniæ ab Olyssipone triginta quatuor passuum millia processere vicum, & natura loci, & opere male munitum. Ibi expositis per otium duodecim armatorum millibus, Antonio urgente, Horrejus ad Turrin veterem, inde ad arcem Sancti Sebastiani, ac denique ad Olyssiponis Suburbium, cui a Bono profectu nomen, tuto loco, & ad excursiones opportuno, castra communiit. Regebat ea tempestate Lusitaniam Albertus Austriacus Cardinalis Apostolicæ Sedis Legatus idem, & Avunculi Regis Philippi Vicarius. Is ad primos de Anglicano apparatu rumores accitis ex interiore Hispania novis peditum, equitumque auxiliis, quæ Petrus Fontejus e Ducis Albani disciplina præerat bellator eximius, adversum occultas populi coitiones vigiliis per silentium distributis, convectorumque intra mœnia ex omni circum agro cibariis; ut primum Anglos adesse nuntiatus est, Fontejo rem acriter administrante præsidia per muros, stationes, excubiasque ad idonea loca disponit. ac trepidantes nihilominus fugamque cum uxoribus, ac liberis meditante Civium plerosque exemplo & auctoritate cohibuit. Crebræ inde eruptiones, & minuta prælia cum Anglis fieri cœpta, superiore semper Hispano. Cumque nec in Urbe tumultus, neque aliunde occulta, vel aperta ab Lusitanis ulla transitio fieret; agrestes dumtaxat quidam inopes, inermesque ad Antonium officii magis, quam belli causa ventitarent; anxius irritum incepto Horrejus, & alimentorum penuria, & quotidiana cæde suorum exterritus, incassum obnitente Antonio, vasa collegit; ac protinus ad Cascale Castellum in ipsis Tagi faucibus, qua in statione classis Dracus habebat, simillima fugæ profectioe sese proripuit. quem interea classici locum super infanda stupra, ac rapinas, & incendia, templis etiam, atque aris everfis, dejectis, perculcatisque Christi, & Sanctorum imaginibus, omni barbaræ impietatis exemplo scædaverant; satis aperto documento quantum Calvinianæ turbæ adventus calamitatis importaturus Hispaniæ fuerit universæ, ni diram luem ab Catholicorum corporibus pariter animisque Divina clementia repulisset. Inde sublati raptim ancoris abeuntes Anglos, & infastæ expeditionis auctorem Antonium sine fine execrantes, Martinus Padilla Regius præfectus, ab tergo triremibus septemdecim insecutus, antequam naves omnes in altum evaderent, unam depressit, duas cepit, totidem missili igne cremavit. Hic maxime fuit exitus Anglicani tumultus. Habitæ supplicationes, & Albertus, Fontejusque servati haud dubie Regni, & custodiæ a pestilenti contagione totius, uti dicebamus, Hispaniæ, omnium consensu triumphalia meruere. Neque lætiores tum in Germania

successus habuit, quamvis alia via grassaretur, hæreticorum audacia. Summo studio dudum enitebantur uti sine ulla fidei professione Ecclesiastici redditus, & opima Sacerdotia Protestantibus cum alibi, tum Aquisgrani præsertim, & Argentinæ paterent: essetque omnibus omnino liberum, solumque divini cultus, & Religionis arbitrium. Iis aliisque de rebus ejusmodi per occasiones jam ante sæpius agitatæ, cum sexdecim postremo ad Rodolphum Legatos misissent, impudentibus postulatis leni tergiversatione, uti ne gentem, cujus ope multas res agebat, exasperaret, obstitit Cæsar: perque frustrationem, & varias ambages, & incerta responsa dilatos, ab se dimisit. Genevam quoque clarissimam, olim Sabaudia ditionis Urbem, ac postremo hæretici veneni officinam, & infame receptaculum pessimi cujusque transfugæ ac desertoris, arcta rursus cingere obsidione, idipsum frustra jam ante conatus, parabat Carolus Emmanuel. Opem in id imploranti Socer Philippus immenso pressus ære alieno; & propriis insuper implicitis bellis, nequaquam ad vota responderat. Sixtus dumtaxat Pontifex quamquam apprimè cautus sacri thesauri custos, tamen, ut primum ea Urbs capta foret, ad res componendas, imperiumque Carolo firmandum, auri millia centum benigne promiserat; ac nihilominus egregia pietate juvenis marte suo rem aggressus, jam ad commeatus intercipiendos in lacu Lemano biremes instruxerat, variis locis Castella excitarat, ac denique damnis, cladibusque Genevates ad consilia deditio- nis propemodum adegerat; cum repente hinc fremitu, minisque Galli Regis, cujus erat in fide Civitas, inde Helvetiorum hæreticæ factionis conspiratione armisque ab inceptis prohibitus est. Eodem anno Cardinales Romani duo prænobiles diem obiere, Alexander Farnesius, & Prosper Sanæacrusius. Huic quantum politiores literæ, neque vulgaris rerum scientia, & difficillimis præsertim rei Christianæ temporibus exhausti in Gallia Regno labores addiderant famæ; tantum asperitas ingenii, & rei familiaris multo infra Senatorium censum angustia, de vitæ splendore, ac nominis celebritate detraxerant. Farnesio super claritudinem generis, & amplissimas clientelas, Regumque maximorum affinitates, congestamque a majoribus opulentiam, corporis quoque decora proceritas, orisque majestas, & morum ac literarum elegantia, & comitas inerat, divitiisque magnificentia par. Ædificia sacra æque ac profana, domi, forisque regium in modum extruxit, religiosa cœnobia, orbos, orbasque, & complures, tum e nobilitate, tum ex infima plebe familias, & statis, & extraordinariis largitionibus munifice sustentavit. benigne fovit semper ingenia, neque præstantes modo in liberali qualibet arte viros apud se in honore habuit; sed etiam eximia indole adolescentes inopia pressos, in celeberrimis disciplinarum gymnasiis aluit. Gravissimis præterea largitionibus perhonorifice functus, multos ex amicorum numero ad Senatorium gradum, ali-

aliquot etiam prævalida suffragatione summum ad fastigium extulit ; quos tamen (adeo fallaces, & improvidæ sunt cogitationes hominum) infensos, infestisque ut plurimum expertus est. Magno ipse animo infestationes & maledicta contemnens, & nullas unquam ultus inimicorum injurias. Obiit prope septuagenarius, longiore (quæ totius erat habitudo corporis) utique usus ævo, ni super acerbos articulorum dolores, & ex ancipiti rerum statu, assidui curarum aculei, congruæ & speratæ vitæ spatia præcidissent. Luxere defunctum præter ingentem familiarium turbam, Clerus ac populus universus. Eidemque non Romæ tantum, sed etiam variis promiscue per Italiam locis exquisito ritu ac cærimonia parentatum est.

Libri Secundi Finis.

JOANNIS PETRI MAFFEJ

E SOCIETATE JESU

HISTORIARUM AB EXCESSU

GREGORII XIII.

PONT. MAX.

LIBER TERTIUS.

Sixtum interea in omnes Reipublicæ partes intentum Gallicani porro tumultus angebant, horrentem haud immerito Christiana Religio tam sævis dudum agitata procellis quo tandem evaderet. Quippe Borbonius, quo uno Calviniani præcipue nitebantur, quamquam ab Henrici Tertii cæde imminuto, uti dicebamus, exercitu; tamen haudquaquam animo fractus, & Principum Regii sanguinis concordie cinctus corona ad fœderatorum distrahendas vires atque consilia copias ita diviserat, uti partem unam in Piccardiæ fines, alteram in Campaniam cum delectis ducibus mitteret. Cum tertia ipse Diepam oram Normanicæ petiit, quo ex Anglia unde auxilia subinde expectabat, facilis tutusque trajetus est. Appropinquanti portæ illico patuere; perque summam gratulationem a præfecto, & oppidanis acceptus, paullo post in eodem tractu Cænum Urbem pari Civium voluntate, mox Neocastrum, sedem olim regiam, territis incolis in deditionem recepit. Inde Rhotomagum quoque caput ejus provinciæ tentare ausus, eruptione repentina trecentos e suis amisit; ac simul Mayneum accito variis e locis exercitu infestum adventare cognovit. Quocirca, metu, ne si pertinacius ibidem hæssisset, ancipiti mox prælio, & ab tergo, & a fronte urgeretur; populatus agros, retro

Die.

Diepam sese recepit. neque a vestigiis Mayneus abscessit. cumque minoris aliquot præliis, una etiam ad Arcus (id loci nomen) non levi pugna Navarræus superior extitisset; conversus ad obsidionem Mayneus præpropere gratulatione gloriari cœpit: literisque magnificis vanæ spei Parisienses implere, quasi communem hostem in eas angustias compulisset, uti vel Oceani sævitati, vel victoris clementiæ sese permittere cogeretur. At ille accitis undique suorum auxiliis, & insuper ex Anglia quatuor millibus peditum confirmatus, in omnem bene gerundæ rei occasionem excubabat animo. Itaque socordia obsidentium satis comperta, & simul nactus opportunitatem, quod Mayneus cum parte copiarum ad recipiendam proditione Ferentam in Piccardos abscesserat; educas repente copias agmine silenti Parisios rapit: & extimas munitiones ab incondita turba male custoditas improvise transgressus, opulenta suburbia pene per otium exhaustit. majora tormenta circiter quatuordecim, magnum captivorum numerum abduxit, e quibus certo redemptionis pretio non exiguam pecuniæ summam (qua vel maxime egebat) nulla sua jactura conflavit. Fama est, cum refugientibus intra mœnia defensoribus potuisse pariter Borbonium irrumpere; sed vel metu ne ditatus rapina miles ab signis abscederet; vel caritate nobilissimæ Urbis, quam sibi pro certo desponderat, ab ea mente abstuisse. Perculit ea res graviter fœderatorum animos, & paullo post cognita Borbonii profectio, Mayneus primum, deinde Nemurcii Dux ingressi Lutetiam, feram perditis prope rebus opem tulere, tarditatem, & ignaviam probris, convitiisque increpante populo. Sixtus ea clade e Maynei literis cognita, vehementer indoluit; ac Parisienses multa benevolentia significatione, peramplisque promissis paternæ solatus est. Accessit ad levandum ex parte mœrorem nuntiata Germanorum strages, quos ab assertoribus confessionis Augustanæ suppetias Borbonio transmissos, Carolus Lotharingæ Dux e primoribus Janvillanæ Societatis obviam expedito cum agmine factus, ipso Galliarum aditu late ceciderat. At Borbonius e Parisiis profectus, affluentibus ad eum undequaque tum prædæ spe, tum bellicæ virtutis admiratione, militibus maxime veteranis, quos ille mira comitate ac benignitate venientes excipere, ac pro meritis deinceps ornare consueverat; intra paucos dies, primo Stampas; dein Janvillanam infausi fœderis officinam; postremo Vindocinium, insignia regionis illius oppida, partim vi, partim voluntate in potestatem redegit. Matura jam ætate, & vivido ingenio Borbonius erat; idemque vel usu rerum, vel indolis altitudine, quantæcumque fortunæ capax; quippe qui orbo Henrico Tertio sanguine proximus Gallicani Imperii majestatem jamdudum erat complexus; & eidem Henrico sublato (ut supra commemoratum est) successor a proceribus, salva Religione Catholica, renunciatus, regia confestim munera sine trepidatione obire instituerat: literisque de com-
muni

muni re ad omnes Ordines datis, comitia ad certum tempus Turones indixerat. quo, præter Curiam Parisiis illuc ab Henrico translata, magnus quoque nobilitatis numerus, & Venetus Orator, & Cardinales Vindocinius Condei frater, & Lenoncurtius egregio cum Sacerdotum comitatu convenerant; Gondio tantum Cardinali Parisiensium Episcopo, cum temporis causa neutrum sese gereret, extra Lutetiam in prædio suo delitescere. Interim dimissis quoquoersum Legatis, Borbonius idem cum omnibus nominis Christiani Principibus, ac Dynastiis, uno dumtaxat Hispano vitato, societatem, & amicitiam vel revocare, vel inire haud sane frustra tentaverat. Siquidem ex iis plerique vel communionis causa, vel Hispaniensium incrementorum invidia, libenti animo sese ad eum aggregarunt. Venetorum in primis extitit insignis in eum propensio, adversis de illo rumoribus contrahere vultum; secundis gestire lætitia; denique certantibus votis ita sese in eundem effundere, ut quasi in Romani Pontificis potestate ornamentum futurum esse providerent, non expectata reconciliatione, Christianissimum Galliarum Regem publice privatimque consalutaverint. Hisce omnium studiis, iudiciisque, & recentium deinceps auxiliorum expectatione subnixus, Turones, dimisso in præsidia exercitu, splendida amicorum prosequente manu, se contulit. obviam itum a cunctis Ordinibus miro plausu ac favore civium, revivere adventum tot jam rebus gestis clarum, tantoque magnatum consensu declaratum Galliarum moderatorem ac Principem. Ibi dum de constabilienda religione, tollendis dissensionibus, revocando agrorum, & Urbium cultu, ordinanda Republica agere instituit; repente fit certior, destinatum esse a Pontifice Romano Legatum in Galliam. Salutaris primo res visa: subiitque spes a communi totius generis parente pro caritate Christiana mitti præstantem aliquem, & pietate, & prudentia virum, qui ad sananda tot Provinciarum vulnera, sedanda bella civilia, & restituendam veterem disciplinam, sese pristinos agnoscentem errores, probatum a nobilitate Regem, pœnitentiæ nomine in gratiam cum Ecclesia Christi reduceret. Hac ille mente opperiebatur, quam mox a quibus oportebat, super ea legatione secum, aut per literas, aut per nuntios ageretur. Ast ubi Cardinalem ex ea familia, quæ haud ita pridem ad Hispaniensem ab Gallicana factione se transfulisset, ad fulciendas fœderatorum vires, cogenda Maynei auspiciis novo creando Regi comitia, Parisios recta contendere, & Civitates Lotharingiis addictas, ex itinere concionabundum in partibus confirmare cognovit; enimvero tum exarsit iracundia, neque prohibuit quominus progredienti pluribus locis insidiæ tenderentur. Ea re comperta Cajetanus, pavidam & inermem Clericorum, & aulicorum turbam, non plus quadraginta equitum præsidio protegente subinde morari; divertenda quærere; quicquid

quid increpuisset, timere coactus est. quoad longo Lotharingii Ducis equitatu, peditatuque Lutetiam tutus, incolumisque perduceretur. Ibi summo concursu, gaudioque Civitatis exceptus, admirandam speciem Apostolicæ majestatis populo exhibuit, longa desuetudine prope jam ejusmodi legationum oblito: & simul infimis Maynei precibus exoratus, cœptantes ob delata stipendia perincommodam seditionem Helvetios e syngraphis Pontificis præsentī pecunia mitigavit. Auri fuere quinquaginta millia dimidium summæ, quam Roma proficiscens a Pontifice in usum legationis acceperat. Conjecti erant in hanc Gallicæ rei disceptationem omnium gentium oculi, & persuasum erat plerisque, uti supra dictum est, Borbonium in hæresim jam ante relapsū, ne tum quidem fide bona agere: sed quod per leges, nī Catholica dogmata jurejurando profiteretur, sceptrā diutius retinere, & rite inaugurari nequiret; iccirco simulata denuo pœnitentia capere Summi Pontificis gratiam, ac tempori deservire. Id ipsum Gallicano vulgo erat infixum, quo facilius Cajetano fuit multitudinem in suscepto Borbonii repellendi consilio continere; adjuvantibus præfertim incredibili quadam alacritate Collegii Sorboniani Theologis, atque concionatoribus, qui conceptam olim in Henricum Tertium iram ac rabiem ejus cæde maxime exsatiati, in successorem pariter dies noctesque fundebant. Impeditior longe erat ratio Regis tali tempore subrogandi, cum ex optimatibus multo maxima pars, uti dicebamus, ad Borbonium traheret res: & nulla convocandorum Ordinum facultas non Cajetano solum externo homini, sed ne Mayneo quidam ipsi omnia versanti, molientique suppeteret. Siquidem, uti modo retulimus, & e Clero insignes viri, & e Curiis non pauci Senatores ad Regem acclamatum ultro sese contulerant; & Mayneum nulla publica auctoritate, paucorum dumtaxat, emtorumque clientum factione, ad summum Imperium erexerant, licet temporis causa tolerantibus magis, quam approbantibus Sociis, & pompa lictorum, stipatorumque, & reliquo principali apparatu, & præscriptionibus literarum, edictorumque pro legitimo rectore gereret sese; & non modo contranitentibus, verum etiam otiosis acerbe minitaretur; & omnium generum mortales in sua verba, perque fas, perque nefas adigeret. Una superesse videbatur, eaque maxime compendiaria concilii habendi, & novi Regis eligendi via; si Mayneus collatis quamprimum cum hoste signis, præclaram ex eo victoriam reportasset: quippe tum accisis Borbonii viribus nobilitatem ad officium redituram, & interregis aucta potentia cunctos imperata facturos; & exclusa Regia stirpe, quod hæretico fovendo sese vinculis anathematis illigasset, consentientibus reliquorum animis, facile diadema ad ipsiusmet Maynei caput esse venturum. Hisce consiliis cum

una semper in speciem protenderetur avita Religio, Mayneus Pontificem Maximum ad hostes Ecclesiæ declarandos Borbonii sectatores, submittendamque sibi pecuniam; Hispaniæ Regem non ad pecuniæ tantum, sed etiam ad copiarum e Belgio firma subsidia, per epistolas, perque procuratores, monitis, & obtestationibus fatigare non desisteat. neque adhibita quantavis arcani diligentia fallebat Borbonium; & ex ipso Maynei contubernio multis multa indicantibus, & ipsum per idoneos homines cuncta sagaciter explorantem. Ergo ratus prævenienda hostium consilia, & frangendos, uti aiebat, hominis inquilini spiritus, per fraudem & ambitionem ad Imperium injustum elati; relictis in præsentia Turonibus, & exercitu festine revocato, aliquot Castella eidem Urbi infesta prope fine certamine occupavit: ac rursus ad Parisiorum obsidionem omnes cogitationes intendit aliquanto difficiliorem, quod Mayneus per eos ipsos dies Pontisaram expugnaverat. Paulo antequam hæc in Gallia gererentur; Farnesius Dux montes Gertrudis in Belgio, munitissimam hæreticorum Urbem, recepit ingenti pecunia; & ejusdem Farnesii auspiciis Marchio Varembonius arcem egregiam Bliembejam, ex qua Schenchiani prædones subitis incursionibus Gueldriam devastabant, vi, metuque ad deditionem adegit. Schenchius ipse laborantibus inopia Berchenfisibus Colonienfis ditionis, quos Farnesiani dudum obsidebant, subvectos adverso Rheno, commeatus per summum silentium importavit: idem lætas Philippi Regis copias per Vestphalium agrum Frisiam petentes, itinerum compendiis repente assequutus, magna cum cæde fugavit; ac pecuniæ vim, quæ in stipendia militum vehebatur, abripuit: elatus dein felicitate, cum Noviomagum prævalidam Urbem, demissa per tenebras classe tentasset; occupatis jam nonnullis ædibus, concursu oppidanorum, haud levi cum strage repulsus ad naves, interque moliendum prolapsus in flumen, gurgitibus haustus est; ingenti Noviomagensium gratulatione, quippe qui aliquoties jam insidiis appetiti, vix atque ægre impias hæretici prædonis manus effugerant. Ab Carolo quoque Mansfeldio populati perduellium agri: Neclum castrum Insulæ Bomelerverti, Mosam inter, & Vahalim, & loco opportuno, & præclare munitum; itemque Brachelium, & Ofsemium partim armis, partim conditionibus brevi recepta. Perque hunc modum in Belgica, & Circumrhenana provincia hostium Ecclesiæ conatibus obviam itum est. Circa idem tempus in Germania superiore Jacobus Marchio Badensis, Helvetiæ, Alsatiaque conterminus, ampla ditione, viris armisque præpollens, auctore Joanne Pistorio Theologo, qui nuper e cæno Lutherianæ impuritatis emerferat, Pistorium ipsum ultro deposcentem cum Smidellinio, & He Rembrandio Hæresiarchis, aliisque Satana ministris, in magna Prin-

cipum

cipum corona commisit ; perque acrem totius tridui concertationem ; agnitis nequissimæ sectæ fallaciis , ad Ecclesiæ Romanæ veritatem ac lucem , seque popularesque suos magno pietatis ardore convertit ; ac septuaginta pseudopphetas ex iisdem finibus palam eiecit , septuagesimo ipso anno , quam dira lues in Septentrionali plaga male custoditas Christi caulas invaserat . Non mediocrem is nuntius Pontifici Maximo , & bonis omnibus attulit voluptatem ; totaque de re Apostolici apud Helvetios Nuntii in Senatu recitatæ sunt literæ . Sed brevis ea lætitia fuit ; siquidem paucos intra menses Jacobus a germanis fratribus in hæretica pravitate obstinatis veneno interceptus est . Neque in Germania tantum , verum etiam in aliis orbis terræ partibus , hoc eodem anno bene gesta Christiana res est . ingens mortalium vis a Dæmonum cultu , damnatis opinionibus , ritibusque , aut e nefario schismate ad rectam fidem , atque ad Ecclesiæ Catholicæ communionem , regulamque traducta . Insequens annus Christianæ rei calamitosior ; legatio , & pecunia fœderatis a Pontifice missa rumoribus in immensum auctis ; & quod in eandem causam aperte descendisse Rex Hispaniæ ferebatur ; Germanos proceres denuo accenderat , uti ad subveniendum Borbonio novas equitum peditumque copias intenta conquestione decernerent . Et Angla Pseudoregina , præterquamquod eidem , & consiliis , & opibus aderat ; Germanos pariter , & Belgas , Turcamque ipsum suis quemque stimulis in Catholicum nomen concire non desisteat . Earum rerum quamvis incerta fama permotus Cajetanus Legatus Mayneum urgere summa ope instituit , uti priusquam ea auxilia convenirent , aucto ipso quoad fieri posset exercitu , cum hoste certaret . Millia circiter octo Gallicæ juventutis magna ex parte rudis , & collectitiæ , Helvetiorum duo circiter , sub signis habebat ; atratorum equitum tria millia , reliquias novissimæ Lotharingianæ cladis nova mercede conductas . Germanicum est genus cum pluribus minusculis tormentis instructum , infectum hæresi , rapinæ deditum , & Helvetiorum in morem usque adeo venale , uti contrariis plerumque Castris eadem natio militet . Hæc copias militi veterano objicere Mayneus , & universi certaminis aleam subire non audebat . a Farnesio deinde missos equites mille , & octingentos accepit , Egmontiano Duce ; in quibus erant Hispanorum , & Eburonum turmæ veteranæ admodum quinque ; ceteri Belgæ nobiles cataphracti , vixdum posito militiæ rudimento . Sub hanc virium accessionem veritus ne si pugnam ultra differret , detrectare periculum , & continuandi imperii causa bellum ducere videretur ; hortante insuper , & instigante Apostolico Legato , ad hostem ducit , secundo rerum cursu Druidas obsidentem . Neque Borbonius occurrere venienti cunctatus est , avidus & ipse

certaminis ; quamquam equitatu inferior , egregio tamen pediti fident . Ad Ibicum vicum constitere exercitus , ita dispositi , ut mediam aciem Imperator uterque , cornua , & subsidia , duces reliqui tuerentur . Signo dein pugnae proposito Mayneus cum equitibus levis armaturae in hostem sese tam acriter intulit ; uti primum agminis frontem non levi cum strage penetraret . Ibi conferta circa delectum ab se Regem nobilitas obstitit , & atræ utrimque cædes fieri cœpta . Egmondanus inter alios cecidit pugnam fortiter ciens . Ex altera parte atrati equites , cum in Vasconas pedites impetum dedissent , nimbo plumbeæ grandinis confestim exterriti , fœde terga verterunt . neque cataphractis , qui agmen claudebant , vel ad ordines densandos , vel ad cohibendam infesta cuspide fugientium turbam , consilium , animusque suppetiit . ita dissipatis ordinibus , nudata peditum latera , & Galli quidem nullo flagitii metu per agros hac illacque dilapsi . Helvetii (quod erant Mayneani robur) positis illico armis victori sese dederunt . neque modo in fidem clementer accepti , sed etiam viritim donati pecunia ; domum ad conciliandam Borbonio gentem universam benigne dimissi . Mayneus & Ducis , & militis nequicquam officio functus , ex hostium jaculis equi celeritate sese præripuit ; flumenque transgressus , ponte soluto remorandi hostis causa , ad Sancti Dionysii , quod oppidum abest a Lutetia duobus passuum millibus , cum exiguo comitatu contendit . Ibi , dum sparsos e fuga milites colligit , ac supplementa conquirat ; Borbonius nequaquam in perniciem Gallici sanguinis exardescens , ab tergis palatorum insectandis abstinuit . ceterum ejus cladis nuntius ut primum Lutetiam est allatus , incolas pariter ac peregrinos tantus inopinanter mœror ac terror invaluit ; ut defixis humi oculis inopes consilii , & summæ rerum plane diffisi torperent . Neque dubium ulli fuit , quin si se victor ab acie protinus ad Urbem duxisset , irrupturus illico fuerit . Sed rursus vastitatem , & exitium clarissimæ Urbi metuens , quam sibi quoad fieri posset intactam , illibatamque servari cupiebat ; Cives in alienatione obduratos , inopia potius & fame domare , quam ferro delere constituit . Ea res fœderatis laxamenti nonnihil dedit , animique ad omnia experienda , priusquam Regem ab Ecclesia Christi sejunctum intra muros acciperent . Ergo ad Mayneum Cajetanus , & Hispaniensis Orator Bernardinus Mendoza , quique capita rerum Parisiis erant , partim solandi hominis causa , partim consultandi de Republica , convenerunt . Placitum uti certa imminente rursus obsidione Mayneus ad petenda fidelia , firmaque auxilia Farnesium adiret ipse , de statu ancipiti rerum Pontifex Maximus , & Hispaniæ Rex quamprimum edocerentur ; uti Urbs , & novis operibus , ac stationibus , & omni commea-

ius genere firmaretur. Sub hæc decreta Mayneus in Belgium abiit. Nemorensis Dux uterinus Maynei frater, custodiæ Urbis cum externorum equitum ala una, peditibus circiter mille præpositus; dispositæ in mœnibus, portisque vigiliæ; refectæ, ubi opus erat, propugnacula, & muri. Quæsitum ab Cameraco frumentum; variæ fruges, & cibaria ex finitimis agris convecta; sed præ magnitudine Urbis, & incolentium numero perexigua. Omnia, ut in Civitate discordi, & legitimis orba magistratibus, segniter ac negligenter acta. Illud quidem Parisienses toto ferme obsidionis tempore egregie præstiterunt (& est in universum Gallica natio mire ad pietatem propensa) uti supplicationibus, lacrimis, jejuniis, & cætera corporis maceratione collectæ, numen, superosque propitiare contenderent. Cajetanus interea e Sixti præcepto Vindocinium, & Lenuncurtium Cardinales, Episcoposque complures, & Catholicam nobilitatem precibus, ac minis a latere Navarræ frustra nitebatur abstrahere. cum ipsimet ultro Cajetanum, per epistolas, perque interpretes ad Regem (uti aiebant) optime animatum invitarent; & in Christianæ rei causâ, retinendique Regis in suscepto conversionis consilio, sese eidem adesse persanctè affirmarent. Et Sixtus partim a Luxemburgio coram, partim ab iisdem regiis, qui sese Borbonio parati ad ejurandam hæresim animi sponsores, atque obsides offerebant; per literas monebatur identidem quanta & virtute militari, & studio optimatum superior fœderatis esset is, quem adversarii, & perfidiæ nomine in suspensionem vocare, & in re bellica verbis obtinere niterentur. Ejusmodi vocibus cum dies, noctesque obtunderentur Pontificis aures, dubia utrimque argumentorum fide; ad extremum ipsemet, quo erat usu rerum, & ingenti solertia, reputare cœpit apud se, quam sint ob privatos cujusque respectus fluxæ, & instabiles belli societates; quam parvi momenti, precaria, nec suis radicibus alte defixa potentia. In suspensionem præterea venerat Mayneus affectati (ut supra dictum est) obtentu religionis, Imperii. Simul obversabatur Hispanorum dominandi cupiditas, quibus opponi Galliæ Regnum, & exæquata Summorum Pontificum vires e Republica ducebat esse: modumque statui genti, non tantum in florentissimis Italiæ ditionibus; verum etiam in ipsa Romana Ecclesia arbitrato suo pene cuncta versanti. Hisce Pontificis Maximi cogitationibus intervenire per eos dies privatæ cum Philippo Rege offensiones, quas Austriaco nomini infensi callidi homines, & aulæ periti, miris artibus acuebant. Ergo paullatim effectum est, ut Sixtus, qui sese initio valde severum, ac rigidum in Regia causâ præbuisset, demitigari quotidie, & benigne cœperit Luxemburgio polliceri. Eodem tempore & Carolus Cardinalis Borbonii patruus, quem

in custodia diligenter ab eodem asservatum Parisienses Regem inepte creaverant, excessit e vita: & Sixtus clam syngraphis e Gallia revocatis non modo fœderatos in recenti apparatu, & ardore belli, sed Cajetanum ipsum nihil minus opinantem in media legatione destituit. Eo fidentior Henricus ad premendam obsidione Lutetiam sine mora sese convertit. Peditum exercitæ fere militiæ duodecim millia, lectissimorum equitum quatuor jam habebat in armis. Hoc exercitu circumjecta Parisiis oppida, & Castella præsertim imposita fluviiis occupare perrexit. Prodicta brevi sunt aliquot: nonnulla expugnata: cetera in fidem voluntaria deditione venere. Obstitere aliquandiu Dionysiani (quos tamen furto recepit) & Leonenses, quorum a mœnibus cum clade repulsus est. Ceterum quo arctior Parisiis annona foret, agrestem quoque turbam intra mœnia compulit: & vagus eques perpetuo discursu cuncta perlustrans, non subvectiones tantum, sed etiam tabellarios commeantes arcebat, ut ad inclusos quid a Mayneo, sociisque ageretur, parareturve, penetrare non posset; multæ gravioribus de rebus interceptæ literæ, & qui perferendas acceperant male mulctati. Cum ipsemet Henricus interea per publica, & secreta colloquia, & per epistolas Civium in suscepta propugnatione constantiam alternis blandiendo, minandoque convellere niteretur. Sed intenta cura cavebant primores ne quid tale ad multitudinis aures perveniret. Verum clausis, uti dicebamus, aqua, terraque itineribus, brevi rerum omnium inopia laborari Lutetiæ cœptum: falsamentis, ac frugibus, herbisque consumtis; equi etiam, & jumenta, fœdaque alia relatu animalia, in alimenta cessere. Inde miseros paullatim non homines, sed hominum umbras, ac simulacra, neque ex infima tantum plebe, sed ex honestis quoque familiis passim vel cibi aliquid, flebilibus modis emendicantes, vel humi stratos, agentesque animam quotidie cerneret. Interdum etiam ægre compressi motus, factio ad Curiam concursu, aut panem aut pacem precibus iratis flagitantium. Non exiguam tamen turbam, ut in præsentibus angustiis, alendam illustres viri, feminæque diviserant inter se, ac in iis Mendoza, quo cum Cajetanus benignitate certabat, circumiens insuper quotidie vicos, plateasque populum exporrecta semper, ac serena fronte, & propinqui auxilii spe, & cetera accommodata ad tempus oratione sustentans. Quinque admodum menses obsidio tenuit: jamque ad extrema ventum erat, despondebantque animos cuncti; cum denique in exitu Augusti mensis ab exploratoribus repente affertur mota profecto Navarræ castra, & patere campos. Farnesius ipsemet Philippi jussu, obtestante & comitante Mayneo, florentissimum exercitum adduxerat; viginti millia peditum bello durata, equitum ad quatuor millia numerabantur: ad quos ad-

juncti

juncti Mayneani summam ferme triginta millium effecerant. Ad ejus exercitus famam Borbonius auctus & ipse viribus, quod victoriæ expectatione commoti ad illum Gonzaga Nivernienſium Dux, alii- que nuper acceſſerant, obviam ire hoſti, & ſi occasio daretur, prælio decertare conſtituit. Duodeviginti millia peditum, equitum varii generis millia ferme ſex habebat in armis. Cum hiſce copiis reli- cta Lutetia progreſſus ad Cellas (id pervetuſti Virginum Cœnobii nomen eſt) tutiſſimo loco ex arte conſedit. ab dextera, a læva- que aſſurgunt colles, denſa vallem claudit ſilva; uti neque ab late- ribus urgeri, neque a tergo circumveniri ullo modo poſſet. Ibi mo- dica quiete ſumta, non magno ab hoſtibus intervallo ita ſuos in- ſtruxit. in utroque tumulo Germanos Helvetioſque pedites cum tor- mentis aliquot campeſtribus locat: equitatum, cui præerat ipſe, in media valle diſponit; præteritis Vaſconum cohortibus, queis maxime confidebat, uti poſt emiſſa in adverſos tela intra equitum ordines, ad fiſtulas replendas ſubinde ſeſe reciperent. Per hunc modum oſten- tata acie Farnēſium aliquoties ad pugnam provocare perrexit. Ille item inter Matronam fluvium, & paludem ex proximo rivo manan- tem, caſtra egregie communierat: & ſatis magnum operæ pretium ſolutam ſociorum obſidionem ratus; animadverſa locorum iniquita- te, intra vallum copias continebat. Cum aliquandiu uter alterum provocaret ambigui conſtitiffent; ad extremum Farnēſius ad oppu- gnandum Lagniacum, quod valido præſidio tenebatur, delectas aliquot cohortes trans flumen mittit, ac ſimul tormentis mœnia quatere in- ſiſtit; ſi forte Borbonium illa oppugnatio ad opem incluſis feren- dam, ex abdita valle in patentiora loca poſſet elicere. Neque is captam ſtationem deferere auſus. Ita in ejus oculis fremente nobi- litate Lagniacum expugnatum; quingenti fere lætiſſimi viri, capto Præſecto, cæſi; diruta mœnia; oppidum ſpoliatum. At Farnēſius quidem ab hoſte palam expreſſa timoris confeſſione contentus, ab laceſſendo ultra Borbonio ſapienter abſtinuit. At ille ſatis comper- to Pariſienſes Farnēſianæ opis fiducia gratulabundos in cuſtodia Ur- bis negligentius agere; furtim audendum aliquod ratus, ſcalarum vi quam occultiffime comparata noctis intempeſtæ ſilentio, relictis repente caſtris recta Jacobæum Suburbium invaſit; inde circa finem quartæ vigiliæ, & nebula, & incerta adhuc luce tegente inceptum, ſcalæ ad eam partem muri, quæ Sanctorum inter Jacobi & Mar- celli portas attollitur, admoveri cœptæ. Senſere vigiles, & ex ho- ſtibus unus, aut alter, qui jam in ſummum evaſerant, ac deſcenſum in Urbem parabant, ſcalis exuti, haſtis, umbonibuſque alte præci- pitati ſunt. Simul ad arma conclamatum; & patefactis inſidiis ir- rito conatu Henricus abſceſſit. Maximo tum in diſcrimine Pariſien- ſes

fes fuere, neque ambigebatur, quin si pluribus simul locis tentatus foret ascensus, inter tumultum, ac terrorem, aliqua saltem Urbis pars occupari potuerit. Servatæ universæ decus tulere Jesuitæ, quorum per id tempus erat celeberrimum in Academia Parisiensi Gymnasium. Ii, ut artibus rebus, cum populari manu id ipsum spatium in muri defensione sibi consulto delegerant: dilapsis dein præ defatigatione, ac tædio reliquis, insomnes ipsi cum Scoto quodam Jureconsulto in custodia perstitere; ac per eum, quem dixi modum instante, ac rem acriter gerente in primis Joanne Lorino Avenionensi, qui sacras dein literas Mediolani, ac postmodum Romæ professus est, accensum populi pertinacia, furentemque hostem ab Civium fortunis, atque cervicibus repulere. Scalæ militares ingenti plebis concursu, plausuque ad Collegium Sociorum delatæ, monumentum in aliquod tempus egregio fuere facinori. Quæ res infensum jam ante Jesuitis Navarræ animum vehementer offendit. Jamque ingruerat Autumnus, & magna nobilium pars (quippe sine stipendio militabant) ad res domesticas intervendas de more discurrebant; graves de suo fiscos in castra postmodum relaturi. Borbonius reliquas interim copias in loca opportuna divisit, ac Sancti Dionysii oppidum in primis selecto milite infedit. Farnesius inde camporum potens, levatis inopia præsentis Parisiensibus, navigationem insuper, & commeatus impostero aperire decrevit. Amicos primum aliquot vicos, & Castella sine sanguine in potestatem redegit. Mox Corbellum oppidum apprime validum, præcipua Sequanæ claustra operibus, ac tormentis aggressus, capto, vel trucidato præsidio, paucos intra dies Mayneo, focisque restituit: inde liberata Lutetia fulgens, ad reprimendam Batavorum ferociam incolumes copias in Belgium reduxit. Hæc ferme in Celtica. Neque ceteris Galliæ partibus erat quies. Lugdunenses adjuncti Burgundiis in Janvillano fœdere stabiles cum Borbonianis gerebant bellum Sanforlinio armorum præfecto Narmurcii fratre, quem Lutetiæ præfuisse retulimus. Gratianopolitani in Delphinatu, Aqueses in Provincia Narbonensi cum ab Hugonotis acriter premerentur, viribus impares, patronum ac defensorum, dum Henrico Tertio Rex novus e communi Catholicorum voto succederet, asciverant sibi Carolum Emmanuelem Sabaudia Ducem, qui Gallica matre Regiæ stirpis ortum sese haud immerito glorians, si res ad suffragia deducta foret, haud dubium se Regni competitorum ferebat. Is cum exercitu Alpes transgressus Forum Julii in ora Narbonensi prænobilem Urbem furto occupavit, impositoque præsidio Hispaniensi, dum ab re bene gesta redit incautior, magnam ex improvviso regionum occursum cladem accepit. Elapsus inde Nicæam retro summa celeritate contendit; assumtisque cohortibus aliquot Hispanici

panici, & Italici generis in Provinciam regressus, omnisque honoris, & officii genere ab Aquensibus in urbem introductus, Imperator est appellatus. Idem a Marsiliensibus accersitus, quod intestinis discordiis Civitas ea ferveret, aliisque e Navarræ factione certavit. Tolosates in Vasconibus, aliique populi Parisiensium auctoritatem sequuti Joyensis ducibus cum Mommorantio Annæ filio. Is Henrico Tertio insensus Occitani tractus imperium ante multos annos invaserat; de finibus quotidie dimicabat. Emmanuel Lotharingius Mercurii in Alvernia Dux, traditam sibi ab Henrico Britanniam Armorum procurans, tria peditum millia ex Hispania nuper acceperat; Avenionenses, ac Venaissini, quamquam invigilante, ac subveniente Romano Pontifice, cujus in ditione sunt; tamen semper pavidi, semperque solliciti ab circumquaque latrantibus Hugonotis pacem annuo tributo redimere, hostemque ipsum pecunia instruere cogebantur. In universum Gallica nobilitas, uti supra memoravimus, ad Henricum inclinabat; ceteri comitiorum inani expectatione delusi, partim sese gerebant medios, partim fœderatis impense favebant. Hic erat Gallicæ rei status. In Belgio Mauritius Batavorum ductor hieme sæviante, priusquam Farnesius in Galliam abiret, dolo Breda potitus est, urbe non levis ad omnia momenti, per negligentiam custodum noctu clam immixtis in arcem institoria navi militibus, ac repente interfecto præsidio, quod Italica ferme natione constabat. Custodes Urbis, uno tantum excepto Capra Vicentino, quod in recuperanda protinus arce, vel certe expectandis e propinquo auxiliis timide se gessissent, a Farnesio animadversionibus, & ignominia notati; quidam etiam securi percussi. Recrudescente dein bello, cum opp. da, Urbesque acerbis exactionibus, aut rapinis agri, vicique funestis utrimque populationibus urerentur; filerent leges, Christiani ritus, & instituta in dies magis, magisque obsolescerent; tantæ calamitatis haud immerito miseratus Cæsar, adhortante Romano Pontifice, pacis interpretem ac sequestrum sese rursus exhibuit. inani, uti antea sæpe, conatu; cum Batavi diuturno armorum usu obdurati, minime tolerandam regionum satellitum dominationem, nec nisi pulsus ad unum Hispanis, quietem Belgio redituram, salvasque fore sibi suas leges, & avita jura contenderent: regii contra fallacibus conditionibus jam ante decepti, nonnisi perdomita contumaci natione, ac sincero Dei cultu restituto, sese domum redituros negarent. Et oneravit per eos dies Mauritius adversariorum invidiam oppidis aliquot, quæ nuper in Cliviensi ditione occupaverat, Gulielmo Duci sponte reddendis, cum ipsi quæ Archiepiscopi Colonienfis accitu circa Rhenum infederant, variis dilationibus pertinacissime tuerentur. Inde per Vestphaliam, vicinasque regiones conciliabula gentis ha-

haberi cepta, non de Hispanis tantum undique exterminandis, verum etiam, quod erat longe capitalius, de religione per speciem libertatis, omnino solvenda. Vehementer etiam cum Senatu Colonienſi actum, uti Calvinianis ad sacrilega celebranda sacra tandem ædes intra eam Urbem publice assignarentur. Ad hæc in Clivienſe Imperium, Gulielmo ætate jam confecta, Joanne filio commota mente ad regendos ultra populos nequaquam apto, hæretici proceres per filiarum Gulielmi nuptias imminebant. Hiſce conſiliis auſiſque Octavius Calatinus Episcopus Sixti nomine apud Coloniam agens, cum ipſe ab ejuſmodi cœtibus arceretur, per idoneos viros ſapienter æque ac feliciter obſtitit. Simul peditum, equitumque nubes, quas hæretici Dynaſtæ in Janvillanum fœdus denuo ſuperbe jaſtarant, permixtarum cladum, & voracis impendii reputatione depulſæ. Angla Chriſtianæ diſcordiæ fax, Germanici, & Polonici litoris quæſtuofa commercia, non ſine aperto rectæ fidei diſcrimine dudum ſummo ſtudio captans, ne conſcelerati voti compos exiſteret, Sixti Pontificis vigilantia, & Sigismundi Regis eximia pietate perfectum eſt. Et Theodoricum Salisburgenſem Archiepiſcopum inter, & Gulielmum Baviaræ Ducem de falis exportatione, veſtigalique acris perquam alieno tempore exorta controverſia, Alphonſi Vicecomitis, cum a Sixto Nuntius Pragam peteret, opportuno interventu ſedata. Sub idem tempus non uno loco, ſed Auiſgrani præſertim, & Argentorati, Catholicus grex ab ſeditionum auctoriſibus, nequicquam interminante Cæſare, gravia multa, & indigna perpeſſi: & prodigii loco habitum, quod paucos intra dies Noviomagi, Batavis oppugnationibus ſacra Sancti Stephani turris elegantiffimæ ſtructuræ in Urbe fere media crebris tormentorum iſtibus ingenti cum fragore procidit; & Bonnæ Laurentinum inclytæ nobilitatis templum de cælo tactum, liquatis repente plumbeis tegulis, licet oppidani ad reſtinguendos ignes catervatim accurrerent, horrendo incendio conflagravit. Interea Græcii diem obiit extremum Carolus Archidux, egregia probitate, ſed impar nobilium cupiditati miniſque, impunitatem non Auguſtanæ modo confeſſioni, verum etiam Calvinianæ ceteriſque promiſcue ſectis, aliorum exemplo, jampridem extorquere conantium: & Romæ circa exitum Auguſti Sixtus e vita deceſſit, non tam ſenio, morbove conſumtus, quam animi angore, curiſque ob ſuſcepta recens cum Philippo Rege certamina. Ejus morti Borbonium non levi ſpe deſtitutum ingemuſſe fama eſt. Cajetanus ad Romana comitia Pariſiis in Italiam extemplo rediit, Vicario Legationis relictæ Philippo Episcopo Placentino partibus fido, quique Gregorii ac Sixti miſſu per varias occaſiones, non vulgarem conſuetudinem, amicitiamque cum Auſtriaca gente contraxerat.

C O D I C I S M A N U S C R I P T I

*Aliqua loca vel emendata, vel emendanda, recte, nec ne apud lectores
judicium esto.*


- | | |
|---|--|
| Pag. 12. lin. 22. <i>injussa</i> | <i>injussu</i> |
| Pag. 16. lin. 8. <i>cum lignis</i> melius | <i>sub signis</i> . Ita Maffæjus pag. 59. |
| Pag. 20. lin. 31. <i>facto</i> | <i>factu</i> . Ita codex Parmensis |
| Pag. 21. lin. 36. <i>admirationem</i> | <i>dimicationem</i> . Parmensis |
| Pag. 25. lin. ult. <i>naufragii</i> | <i>navigii</i> . Parmensis |
| Pag. 39. lin. 25. <i>pertentata</i> fortasse | <i>pertentando</i> scribendum |
| Pag. 40. lin. 10. aliqua defunt | |
| lin. 15. <i>missus</i> | <i>missu</i> . Ita Maffæjus pag. ult. & sensus
postulat |
| lin. 21. <i>factis</i> | <i>facti</i> |
| Pag. 41. lin. 34. <i>ducturus</i> nunquid | <i>erupturus</i> , vel simile participium? |
| Pag. 42. lin. 5. <i>sollicitus</i> participio | <i>erat</i> expressum congrueret |
| lin. 28. <i>possidendam</i> | <i>possideri jam</i> |
| Pag. 43. lin. 29. <i>cognoscendum</i> | <i>recognoscendum</i> |
| Pag. 44. lin. 36. <i>denique</i> | <i>deque</i> |
| Pag. 45. lin. 3. <i>exclamant. pavidique</i> | <i>Exclamant pavidum, atque Antuer-</i> |
| <i>Antuerpienses ignes.</i> | <i>pienses ignes.</i> |
| lin. 18. <i>præruptis</i> mallet | <i>perruptis</i> |
| lin. 38. <i>florentina</i> | non assequor vocem |
| Pag. 49. lin. ult. <i>quo mendum. pro</i> | <i>qui</i> |
| Pag. 54. lin. 8. <i>dimiserat</i> | <i>diviserat</i> |
| Pag. 57. lin. 7. <i>& syngraghis</i> | <i>e syngraphis</i> |
| lin. 19. <i>alijs</i> | <i>atque</i> |
| lin. 28. <i>Mayneus quem</i> | <i>Mayneum</i> |
| Pag. 58. lin. 36. <i>circum Rhenanam pro-</i> | <i>Circumrhenana provincia</i> |
| <i>vinciam:</i> | |
| Pag. 59. lin. 17. <i>auctis</i> subrogarem | <i>aucta</i> |
| Pag. 61. lin. 9. <i>præstitissent</i> | <i>præstiterunt</i> |
| lin. 18. <i>colleste</i> nonnisi divinando emendaverim | |
| lin. 33. <i>exæquata</i> videtur mendosum | |
| Pag. 65. lin. 4. hæret sensus | |
| lin. 9. <i>Armoricorumque, Armoricorum, vel Armoricamque</i> | |
| <i>pro Condeus, Condeanis passim vulgatus Condeus Condeanus</i> | |

Errorum typographicorum obvia legentibus emendatio.

UNIVERSITY OF ILLINOIS-URBANA



3 0112 059970217



UNIVERSITY OF ILLINOIS-URBANA



3 0112 059970217